

عنوان الكتاب: رواية  
الموضوع: نظرية الفرقة  
المؤلف: يوسف الناصر  
تدقيق لغوي: خلود أحمد محمد  
تصميم الغلاف: بسمة فرج  
تنسيق داخلي: خلود أحمد محمد  
رقم الإيداع: ٢٠٢٣/١٣٧٨٦  
الترقيم الدولي: ٩٧٨-٩٧٧-٨٩٥٧-٧٦-١  
الناشر: القاهرة اليوم للنشر والتوزيع  
المقاس: ٢٠ x ١٤



رئيس مجلس الإدارة

د/ أحمد جبال

جميع الحقوق محفوظة ويحظر طبع أو تصوير أو تخزين أي جزء من  
الكتاب بأية وسيلة من وسائل تخزين المعلومات إلا بإذن كتابي صريح  
من الناشر

# نظرية الفرقطة

للكاتب / يوسف الناصر

# جدول المحتويات

١	المقدّمة
٥	عم فهِيم
١٠	عبد الرَّحْمَن
٢٠	بودي
٣١	حنان
٣٥	عم حُسَني
٤٠	فَرَح
٤٨	وديح
٥٤	هايدي
٦٢	سالم
٦٨	عُمَر
٧٥	هدير
٨٢	فرغلي
٨٧	أميرة
٩٦	شريف
١٠٤	سارة
١١٢	عاصم

- ١٣٠ ..... طه
- ١٤٢ ..... مينا
- ١٥٤ ..... أحمد
- ١٦٧ ..... فضل
- ١٧٨ ..... القبض على شريف
- ١٩٣ ..... باب النجاح

# المقدمة

أحب أعرفكم بنفسي..

أنا شريف.. أقصد الدكتور شريف..

- أنت صحيت يا دكتور البهايم!

لا ده أخويا عادي، دايماً الواحد بياخذ الطاقة الإيجابية من عيلته دايماً، أنا من مواليد القاهرة، دراستي كانت في علم النفس في جامعة القاهرة، وتخرجت الحمد لله بتقدير مقبول مع الرأفة وحببت أكمل دراسات عليا لكن للأسف، ملهومش في الطيب نصيب، قُلت أفتح عيادة وربنا كرمني آخر كرم في العيادة بكام دبانة مسليين وقتي ربنا يخليهم ليا، والنهاردة هطبق

أهم نظرية هيعرفها التاريخ، نظرية الفرفة  
لازم كلنا نفرط، يا شباب الفرفة هي الحل..

- يا شريف!

- أيوة يا ماما.

- تبقى تروح عند خالتك تكشف عليها

علشان سنانها وجعاها!

محدث في عيأتي معترف إنني دكتور نفسي  
خالص، كلهم بيشوفوني دكتور على حسب  
الوجع الموجود.. أرجع لموضوعنا تاني..

إيه هي نظرية الفرفة اللي هتغير العالم؟!

النظرية عبارة عن جهاز بيدخل في اللي عايز  
ينتحر وبيختار طريقة الموت اللي هو عايزها،  
ويتوكل بقى بدل الطرق القديمة، لازم نتطور يا  
جماعة مش كل الانتحار يكون بالشنق لإما قطع  
أوردة لإما برشام سوس، لا في طرق جديدة  
وحديثة وأنا قررت أعرّفكم بالجديد ونزلت  
إعلان عن النظرية، وفي ٢٠ حالة جاية النهاردة

علشان تفرط، وكتبت في الإعلان من ضمن الشروط للمشاركة في النظرية وجود طريقة مفضلة للمنتحر للانتحار بها، يعني لازم يكون محدد عايز يموت بآيه، وكمان وجود موضوع يستحق للانتحار علشان مش كل واحد يزعل شوية بيجي وعايز ينتحر كذا احنا مش هنخلص..

وخلص النظرية هتكمل النهاردة وفي ٢٠ مريض هيفرطوا عقبال ما نوصل للمليون، ياه ده حلم حياتي! واكتشفت إنني من وسط ال ٢٠ حالة في منهم خمس بنات وطفل واحد واثنين رجالة كبار في السن، و ١٢ شاب ما بين ال ١٥ وال ٣٠ سنة.

يا جماعة مفيش داعي للدوشة دي كلها كلكم ٢٠ شخص بس، كل واحد يلتزم بدوره وما تقلقوش كلكم هتفرطوا النهاردة بس علشان نكسب وقت، كل واحد قبل ما يدخل يكون محدد عايز يموت ازاي، ولو مش محدد حاجة ما تقلقوش برود

احنا عاملين لكم قائمة فيها أفضل طرق الموت..  
اختاروا منها الطريقة اللي هتناسبكم قبل ما  
تدخلوا علشان تكسبوا وقت، وكم ان لازم  
الموضوع اللي عايز تنتحر علشانه يكون مهم..  
فاهمين.. لازم يكون مهم..

وبالتوفيق للجميع.

دخّل يا خالد واحد واحد وبالذور..

خالد: حاضر يا دكتور ادخل يا عم فهيم!



# علم الفقه

د/ شريف: ايه مشاكلك يا حاج؟!!

عم فهيم: مشكلتي يا ابني اني ملىش قيمة.

د/ شريف: ازاي بتقول كده؟!!

عمي فهيم: أنا اللي تعبت وربيت وكبرت  
وعلمت، وبعد ده كله اترميت زي الكلب  
ومحدّش بيسأل فيّا ولا حد بيعبرني بغير رنة كل  
فين وفين بيظمنوا عليّا إذا كنت لسه عايش ولا  
ميت.

د/ شريف: آخر مرة شوفت ولادك كانت امتى يا  
عم فهيم؟!!

عم فهيم: من تسع شهور يا دكتور.

د/ شريف: وطول التسع شهور دول محدّش  
زارك ولا حتى زيارة واحدة.

عم فهيم: كل واحد يا ابني فيهم بيدور على  
مستقبله ومحدّش فاضي فيهم، وقتهم بقى بفلوس

يا ابني، أصعب حاجة إنك تزرع شجرة علشان  
تضلل عليك لما تكبر وتهتم بيها وترعاها كل  
يوم، وأوّل لمّا تكبر تضلل على نفسها وبس.

د/شريف: طب وأحفادك مش بتشوفهم ده حتى  
أعز من الولد ولد الولد؟!!

عم فهيم: والله نفسي أشوف أحفادي وأحضنهم  
ويقعدوا يلعبوا حوالئنا ويتنططوا ويملوا البيت  
فرحة، لكن حتى أحفادي مش مخليني أشوفهم  
وبيقولوا إنهم في مدارس لغات، والسنة كلها  
دراسة ومش عارفين إن ده كله هيترد لهم أوّل  
لما يكبروا، كله سلف ودين يا ولدي وأبوك لازم  
تعامله زي ابنك لما يكبر، أنا مش ملاية ولا  
لحاف يا ولدي علشان تسنده وكل سنة تشوفه، أنا  
إنسان يا ولدي لحم ودم وعايز حد يهتم بيّه  
ويديني الدواء في ميعاده، ولو عطشت في الليل  
الأقي حد يجيب له كوباية الميّه ولو مُت الأقي  
حد يحس بيّا، كابوس يا ولدي كل يوم إنني مش  
عايز أموت ومحدّش يحس بيّا، لكن أوّل ما

قريت الإعلان بتاعك صدفة قلت أهو جالك  
الفرج وهيدفني مش هيسييني لحد ما ريحتي  
تطلع وحد من الجيران يشمها، علشان يقولوا  
لأولادي وييجوا ييدفوني بعد ما أعفن، وصيتي  
ليك يا ولدي تدفني أول لما أموت على طول أنا  
جاي وجايب لك معايا مفتاح المدفن بتاعنا، ادفني  
ومتقولهومش إنني أنا مت علشان مش هفرق  
معاهم إنني أنا لسه عايش ولا مت.

د/ شريف: حاضر يا عم فهيم وصيتك هنفذها لك  
حابب تموت بآيه؟!!

عم فهيم: أي حاجة يا ولدي حتى لو كانت صعبة  
مش هتبقى أصعب من اللي أنا فيه دلوقتي،  
موتني أسد يا ولدي زي ما عشت أسد ياكلني  
أسد.

د/شريف: زي ما أنت عايز بس هتاخذ البرشامة  
دي وهتدخل جوّه الجهاز وأقل من ١٠ دقائق إن  
شاء الله تكون مقابل وجه كريم.

عم فهيم: زي ما وصيتك يا ولدي.

د/شريف: ماشي يا عم فهيم، شغل يا خالد في  
حاجة عايز تقولها قبل ما تموت يا عم فهيم!؟

عم فهيم: خلاص تعالى يا أسد آه آه آه ه ه ه ه ه!

د/شريف: بتمدع ليه وأنت بتموت ما أنت اللي  
اخترت كده.. يلا الله يرحمك!

# محمد الرَّحْمَن

دَخَل الحالة اللي بعدها يا خالد واستتى لحد ما  
الأسد يخلص وخذ الباقي علشان تدفنه.

خالد: ماشي يا دكتور.. ادخل يا عبده.. عبد  
الرحمن يا دكتور!

د/شريف: وجاي تدلعه قبل ما يموت اتفضل يا  
عبد الرحمن، إيه الموضوع اللي عايز تنتحر  
علشانه؟!!

عبدالرحمن: عايز.. عايز أروح عند أمي!

د/ شريف: مش فاهم هي مامتك ماتت؟!!

عبد الرحمن: أنا اللي قتلتها.

د/ شريف: عملت كده ليه؟!!

عبد الرحمن: كان غصب عني كنت مسطول  
ومش دريان بحاجة.

د/ شريف: اهدى واحكي الحكاية من الأول كده!

عبد الرحمن: أنا كنت طالب متفوق في كلية نظم ومعلومات يا دكتور، وجالي في يوم شاب من اللي أنا بعرفهم صفحته اتقلت وقال لي رجعتها لي يا باشمهندس وهديلك حاجة حلوة، ورجعتها له بسهولة واداني سلوفانا بفتحها لقيتها مخدر وشربته، قلت لما أجرب هيحصل إيه يعني وجربت والحق بصراحة كانت حلوة أوي..

وجالي ثاني يوم بصفحة بتاعت حد ثاني وقال لي افتحالي، وفتحها له بردو واداني السلوفانا هي هي واتعرفت إني هكر وبقى صيتي مسمع أوي صفحة من هنا على واي فاي من هنا وكله بالسلوفانا بردو.

لحد ما جاتلي شغلانة في شركة محترمة بمرتب محترم جدًا فبدأت اشتغل واقبض المرتب بس المرتب مكنش بيكفي إلا اللي أنا بشربه، فاضطريت أرجع بعد الشغل في الشركة اشتغل هكر ثاني، لحد ما في يوم جات لي مصلحة فيها نص فرش قلت دي بقت عنب على الآخر



وخلصت المصالحة وكان نص الفرش ده هيكفيني  
أسبوعين كاملين ومش هحتاج شغل تاني،  
ودخلت بيه أوضتي وخبيته لكن أمي كانت  
عارفة إنني بشرب مخدرات فكلمت مصحة وجت  
أخذتني وقعدت في المصحة ٣ شهور لحد ما  
جسمي خف من الهباب اللي كنت بشربه.

ورجعت البيت تاني والشغل بتاعي تاني وكنت  
عارف إنني مخبي نص الفرش، بس كانت عندي  
عزيمة قوية، لكن يوم في يوم العزيمة بدأت تقل  
والكيف بيطلب، فروحت أخذت منها حنة ولقيتها  
وشربتها ولقيت مفيهاش كيف زي الأول وقلت  
أنا ازاي كنت بشرب ده أساساً وعقلت، لكن  
الكيف زنان خلاني أرجع واشرب تاني  
وضاعفت اللي كنت بشربه علشان أعمل دماغ  
زي الأول وخلصت النص فرش ورجعت  
أشتري من الفلوس اللي كنت محوشها، وبعد كده  
من فلوسي اللي كانت بقبضها، وبعد كده رجعت  
أشغل تاني هكر علشان أعرف أجيب الكمية

اللي أنا محتاجها، لكن كل يوم مكنش بيجيب الكمية اللي أنا كنت محتاجها علشان بقيت بشرب أضعاف الكميات وابتديت أخذ الحاجات الغالية اللي في البيت واللي مش باينة علشان أبيعها، في يوم ذهب أمي، في يوم ساعات أبويا - الله يرحمه - وده كله كان بيقضي اليوم، وفي يوم ملقتش حاجة أبيعها فأخذت موبايلي وموبايل أمي علشان أبيعهم علشان أعرف أجيب بيهم حنة ونزلت وكدبت على أمي وقولتها إني واخدهم أصلحهم ولما رجعت قولتها إنهم اتسرقوا هما الاتنين.

وتاني يوم أفنعتها إنها لازم تجيب فلوس من البنك علشان تشتريلي موبايل جديد علشان منظرني قدام صحابي في الشغل، وسحبت مبلغ مش بطال وأخذت منها الفلوس وبدل ما أجيب بيهم موبايل جيبت بيهم كمية حلوة تكفي شهرين، وفضلت أشرب وكل ما كانت أمي تسألني على الموبايلات أقولها لسه الشركة مجابتهومش من

برّه مصر، والحاجة اللي جبتها خلصت وقلت  
لأمي إنها لازم تروح بكره وتسحلي فلوس تاني.

فقالتلي: أنت رجعت تشرب تاني يا عبد الرحمن!  
زعت فيها وقلت لها: أيوة وعايز فلوس.

راحت قالتلي مَفيش فلوس تاني يا عبد الرحمن  
ولازم تبطل اللي أنت بتشربه ده!

وادتني بالألم والمفروض بعد الكلام ده كنت  
أفوق، لكن قمت وأنا مش دريان بنفسي غير وأنا  
جايب السكينة من المطبخ و وبدبح أمي زي ما  
بدبح أي فرخة، ومكنتش أمي وهي بتموت  
بتعافر ولا بتصرخ، دي كانت مبتسمة ابتسامة  
لزقت في حياتي ومش بتفارقني أبدًا.

نفسي أمي ترجع تاني علشان تشوفني ازاى أنا  
اتظبط كده وبطلت خلاص والله مش هشرب ولا  
هشرب تاني، لكن عايز أشوف أمي حتى لو

ثواني وطبعًا مش هينفع ترجع تاني فأنا اللي لازم أروح لها، وأقولها القاضي مكذبش!

د/ شريف: قاضي إيه عبد الرحمن؟!!

عبد الرحمن: أنا لما تقبض عليا يا دكتور القاضي قال لي لو حبستك ابقى ريحتك، لكن هسيبك تتعذب برّه يمكن تموت وحبسني ست شهور لتعاطي على المخدرات وبراءة من تهمة القتل علشان المخدرات، وصدق، يا ريته كان حبسني ولا حتى عدمني لكن سابني أتعذب عذاب محدّش شافه ولا هيشوفه في حياته.

عارف لما يكون قدامك باب الجنة وأنت تقفله بإيدك، أنا قفلت باب الجنة بإيدي يا دكتور، الأم دي يا دكتور أغلى حاجة في الدنيا عمرك ما هتحس بغلاوتها غير لما تروح منك، هي القلب الحنين هي أكثر واحدة بتخاف عليك هي أكثر واحدة بتهتم بيك، هي أكثر واحدة بتتصل بيك.

البصلة في إيد أمي أحسن من الخروف، دلوقتي  
أدفع عمري كله وأقعد قدامها خمس دقائق بس،  
موتني يا دكتور.. أنا عارف إني هروح النار  
وأمي هتكون في الجنة، لكن أنا عارف إني ربنا  
رحيم وهيخليني أشوفها وأقعد معاها أكيد قبل ما  
أترمي في النار، موتني يا دكتور...!

د/ شريف: حاضر، الجهاز فاضي يا خالد؟!

خالد: فاضي يا دكتور شريف.

د/ شريف: خد يا عبد الرحمن البرشامة دي  
وهتدخل الجهاز ده، عايز تموت بإيه يا عبد  
الرحمن؟!

عبد الرحمن: اللي يموت أمه بإيده مَيستحقش  
غير النار، عايزك تولع فيا يا دكتور وعلى نار  
هادية، عايز أخذ أكبر وقت أتعذب فيه، مش  
عايز أموت وأنا مرتاح.

د/ شريف: حاضر، في أي وصية عايز تسيبها  
لحد يا عبد الرحمن؟!!

عبد الرحمن: وصيتي ليك أنت، لو في حنة في  
جسمي لسه متحرقتش ولع فيها تاني، مش عايز  
يفضل فيا غير شوية رماد وخده وحطه في ميه  
نار باردة!

د/ شريف: في حاجة ناسيها عايز تقولها؟!!

عبد الرحمن: لا.

د/ شريف: شغل يا خالد!

عبد الرحمن: آسف يا ماما، أنا جاي لك،  
وحشتيني واوعي تكوني لسه زعلانة مني.. آه ه  
ه ه!

خالد: تستريح يا دكتور؟!!

شريف: لأ، دخّل اللي بعده يا خالد لحد ما  
يخلصوا، كل واحد على حسب دوره.

خالد: أدخل يا بودي!

پوڊي



شريف: أهلاً بودي.. ولد غسل أوي.. ماما  
عارفة إنك هنا؟!!

بودي: لا واوعى تقول لها يا عمو!

شريف: حاضر يا بودي مش هقولها، قولّي  
عرفتنا وعرفت مكاننا ازاي؟!!

بودي: شوفت ورقة مرمية في الشارع هو  
وقريتها وجيت.

شريف: عندك كم سنة يا بودي؟!!

بودي: ٩ سنين.

شريف: يعني أنت في سنة تالته صح؟!!

بودي: صح.

شريف: وعاييز تنتحر ليه يا بودي، أنت مش  
عارف إن الانتحار ده صعب ووحش وبيغضب  
ربنا كمان؟!!

بودي: طب بدل ما هو بيغضب ربنا أنت بتعمله  
ليه؟!!

شريف: طفل لكن مقنع بصراحة، طب أنا  
مَلْقَيْتَش حد يقول لي ده غلط وأنا صغير، لكن أنا  
بقول لك إن ده غلط من دلوقت علشان مَتَعْمَلَش  
زيي لما تكبر.

بودي: مَتَقَلَقَش أنا مش عايز أكبر.. أنا عايز  
أموت.

شريف: ليه مش عايز تكبر؟! ده أنت بكره هتكبر  
وتبقى حاجة حلوة كده.. دكتور أو مهندس أو  
ظابط أو مذيع أو فنان.

بودي: لا أنا عايز أموت.

شريف: طب عايز تموت ليه؟!!

بودي: عايز أموت وخلص، موتني يا عمو!

شريف: للأسف أنا مَيَنفَعش أموتك غير لما  
أعرف أنت عايز تموت ليه؟! وكده يا إمَّا بلاش..  
هتقول ولا بلاش!؟!

بودي: هقول لك يا عمو بس او عى تقول لبابا أو  
ماما أو ميس رجاء!

شريف: مش هقول لحد يا بودي مَتخافش،  
وعشان تتأكد إني مش هقول لحد أنا هجيب لك  
مصاصة حلوة بطعم البطيخ عشان تدلع وأنت  
بتتكلم.. يا خالد!

خالد: أيوة يا دكتور.

شريف: روح هات مصاصة بطعم البطيخ  
لبودي!

بودي: تفاح.

شريف: بالتفاح يا خالد.

خالد: ماشي يا دكتور ما احنا قلبناها حضانة هنا!

شريف: يلا يا بودي يا سكر قولّي إيه بقى اللي  
مضايقك ومخليك عايز تنتحر؟!!

بودي: صحابي في المدرسة والمدرسين.

شريف: ليه كده يا بودي؟!!

بودي: بيتريقوا على شكلي يا عمو.

شريف: ازاي احكيلى!!

بودي: شكلي يا عمو بيتريقوا عليه.

شريف: على فكرة هي نفس المعاناة، بس ماله  
شكلك ما هو كويس أهو وحلو عايز إيه تاني..  
هما بيقولوا لك إيه؟!!

بودي: بيفضلوا يقولولي شكلك ده مش حلو  
وجذمتك شكلها وحش مع إني بحبهم يا عمو ولما  
بحاول ألعب معاهم، كانوا بيقولولي أنت مش  
بتعرف تلعب كورة أقف جون وكمان وأنا طالع  
من المدرسة..

خالد: اتفضل يا دكتور المصاصة اللي أنت  
طلبتها وملقيتش فكة فجبت لك اتنين.

شريف: خلاص هاتهم واطلع برّه، اتفضل يا  
بودي أنت واحدة وأنا واحدة.. الله طعمها حلو  
أوي.

بودي: آه حلوة.

شريف: كملي وأنت خارج من المدرسة إيه اللي  
بيحصل معاك؟!!

بودي: بيعدوا يقولولي يا تخين يا فشلة وساعات  
بيضربوني وييجروا وأنا علشان تخين مش  
بعرف أجري وراهم.

شريف: طب مفكرتش تقول للميس في مرة إنهم  
بيضايقوك ولا حاجة؟!!

بودي: ما الميس كمان بتتريق عليا.

شريف: الميس كمان بتقول لك إيه؟!!

بودي: كانت بتقولِّي شعرك ده عايزة منه شوية،  
عندي غسيل مواعين النهاردة، ولما كنت بجاب  
معاها غلط كانت بتقول لي أقعد يا عجل!

شريف: طب مفكرتش تقول لبابا علشان يروح  
معاك المدرسة ويتصرف معاها؟!!

بودي: بابا مش في البيت.

شريف: ما أنا عارف إنه مش في البيت دلوقت،  
بابا في الشغل، فأنت ليه مفكرتش تقول لبابا أول  
لما يرجع من الشغل؟!!

بودي: ماما بتقول إن بابا مش هيرجع تاني.

شريف: ليه هو بابا عند ربنا؟!!

بودي: لا بابا عند مامته علشان هو متخاف مع  
ماما.

شريف: ودي أول مرة يتخانقوا فيها مع بعض،  
ولا الموضوع ده بيحصل كثير؟!!

بودي: هما كانوا بيتخانقوا كل يوم لحد ما بابا  
طلع ومَرَجِعش تاني.

شريف: بقالوا كتير بابا برّه البيت؟!

بودي: آه.

شريف: طب مَقُلْتش ليه لماما إن في حد بيضايقك  
في المدرسة علشان تروح معاك؟!

بودي: لأ قُلْتلها وقالتلي أنت ليه مربى شعرك  
كده؟! ما أنت لو حلقت مَكْنش حد اتريق عليك..  
وأنا بحب شعري أوي يا عمو.

شريف: شعرك حلو يا قلب عمو، طب مَفْكَرْتش  
تقولها تاني وتالت وتزن عليهم لحد ما كانت  
تيجي معاك؟!

بودي: ما هي مَكْنْتش بتبقى فاضية علشان  
الطلاق، وكانت بتقول لميس رجاء وميس رجاء  
كانت بتضربني علشان ما أقولش لماما تاني.

شريف: أنت تعرف يعني إيه طلاق يا بودي؟!!

بودي: لا يا عمو بس ماما كانت بتقولي أخلص  
موضوع الطلاق و آجي معاك المدرسة.

شريف: طب تمام كده الحمد لله، بص يا بودي انا  
هاجي معاك بكره المدرسة وهخلى ميس رجاء  
متضربكش تاني وما اخليش صحابك يتريقوا  
عليك تاني ولا حتى يضربوك تاني، إيه.. موافق  
ولا أنت عايز تموت؟!!

بودي: لا أنا عايز أموت يا عمو.

شريف: ده آخر كلام؟!!

بودي: آه.

شريف: كلام رجالة؟!!

بودي: آه.

شريف: جهّز يا خالد الجهاز!



خالد: بس ده طفل يا دكتور حرام!

شريف: الموت يا خالد مش بيفرق بين كبير  
وصغير.. قولِّي يا بودي عايز تموت بايه؟!!

بودي: أموت بالتراب وانفخ تراب في وشي لحد  
ما أشمه واموت يا عمو.

شريف: لا التراب مش بيموت يا حبيب عمو، إيه  
رأيك تموت في الميه! بهزر معاك.. ماشي خد  
بقى البرشامة دي وقولِّي عايز تقول حاجة لحد  
قبل ما تموت؟!!

بودي: قول لبابا إني كنت عايزة يجييلي الكوتشي  
اللي بينور.

شريف: حاضر يا حبيبي في حاجة تاني عايز  
تقولها؟!!

بودي: لأ يا عمو.

شريف: غرّقوا يا خالد!

خالد: أغرّقه إيه حرام عليك ده طفل!

شريف: يعني إيه طفل..! أنا روحت جييته من  
بيتهم ولا هو اللي جيه بنفسه وعايذ يموت، رد  
عليا.. اطلع برّه يا خالد ودخل اللي بعده سلام يا  
بودي هتوحشني!

# حنان

خالد: اتفضلي يا استاذة حنان يا كش نخلص من اليوم ده.

شريف: اتفضل برّه.. منورة يا أستاذة اتفضلي استريحي.. إنسانة جميلة وحلوة زيّك بتفكر في الانتحار ليه؟!!

حنان: علشان هما بيقولولي لو مموّتش نفسي هما هيقتلوني!

شريف: هما مين؟!!

حنان: معرفش أهم يا دكتور.. سامع سامع..

شريف: مش سامع حاجة.. بس ممكن تقولي هما بيقولوا إيه؟!!

حنان: بيقولولي إنهم هيموّتوني لازم أموت نفسي قبل ميموّتوني.

شريف: طب تمام متقلّيش.. هموتك حاضر بس قبل ما أموتك قوليلي بتشوفي اللي بيكلمك؟!!

حنان: لا

شريف: طب ما تقوليلهم عايز أشوفكم!

حنان: لا أنا أخايف.

شريف: هتخافي من إيه ما أنتِ هتموتي؟!!

حنان: خايفة ليموتوني!

شريف: هتفرق معاكِ في إيه لو موتي نفسك أو  
هما موتوكِ.. ما أنتِ كده كده هتموتي هو هو  
نفس الطريق؟!!

حنان: لا أنا مش عايزاهم يموتوني، أنا اللي  
هموت نفسي، هموت نفسي دلوقت علشان  
أرتاح، موتني.. موتني.. موتني يا دكتور!

شريف: حاضر بس قبل ما تموتِ لازم تشربي  
البرشامة دي!

حنان: هات هات بسرعة عايزة أموت!

شريف: حاضر عايزة تموتِ بابه؟!!

حنان: أي حاجة.. أي حاجة.. بس بسرعة.

شريف: مش عايزة تسيبي أي رسالة لحد تعرفيه!

حنان: لا عايزة أموت.. مش عايزة أسمع الصوت ده تاني.. صوت مرعب يا دكتور أهو اتكلم تاني.. موّنتي يا دكتور.. موّنتي أبوس إيدك!

شريف: جهّز الجهاز يا خالد هتنتحر وهي بترمي نفسها من مكان عالي.. آه مَفيش موتة أسرع من كده؟!!

حنان: ماشي يا دكتور شكراً.. آه آه آه.

شريف: لا تشكريني على إيه طيري أنتِ.. اللي بعده يا خالد وربنا يحافظ على الربع اللي فاضل!

عمو حسيني

خالد: اتفضل يا عم حسني!

شريف: اتفضل استريح يا راجل يا بركة، ها  
قولِّي عايز تنتحر ليه؟!!

حسني: علشان بقيت عيب على عيلتي.

شريف: عيب ازاي ممكن توضح لي؟!!

حسني: الواحد كبر خلاص ومبقاش قادر يعول  
هم نفسه، ولادي هم اللي بيأكلوني ولا هما اللي  
بيسندوني ولا هما اللي بيدخلوني الحمام، مَفيش  
حاجة بقدر أعملها لوحدي!

شريف: ما أنت جيت هنا لوحديك أهو وأنا شايف  
إن موضوع مَيستحقش الانتحار، أنت ربيت  
ولادك صح وشلتهم وهما صغيرين وهما لما  
كبروا شالوا لك الجميل وشالوك مش شايف فيها  
أي مشكلة خالص!



حسني: لا يا ابني في مشكلة بين ولادي ومراتهم بسببي، وأنا خلاص رجلي والقبر ومش عايز بيقالي مشاكل مع حد، علشان لما أموت كله يدعيلي مش يدعوا عليًا ويقولوا لي خرب بيت عياله قبل ما يموت.

شريف: إيه سبب المشاكل اللي بين ولادك ومراتهم؟!

حسني: بسبب الفلوس ملعون أبوها يا ولدي اللي تخلي الناس تعمل في نفسها كده، زمان يا ولدي في الخمسينات كانت الفلوس دي قليلة خالص، الواحد اللي كان بيقى معاه جنيه كان بيقى مليونير كلها كانت بنكلة بسحتوت ومليم وتعريفة، والناس الغنية بس هي اللي كان بيقى معاه القروش وكانت الناس عايشين والحمد لله والدنيا كانت ماشيه وفيها الخير والبركة.

شريف: يعني مشكلك في الفلوس؟!

حسني: ولادي يا دكتور على قد حالهم وانا  
علاجي في الشهر بمبلغ كبير، ويا ريتي قادر  
أشتغل علشان أساعدهم والعيال شغلهم على قدهم  
بردو، يعني الفلوس اللي بيجييوها يا دوب مكفية  
بيوتهم بالعافية وعيالي عمالين يوفروا من أكلهم  
وأكل عيالهم علشان يجيولي الدواء، وكل ده ليه..  
علشان واحد عاجز عايش على كرسي بعجل،  
كفاية يا ولدي مش عايز أعذب معايا حد أكثر من  
كدا؟!!

شريف: غريبة.. حد يلاقي الحب ده كله وعايز  
ينتحر؟!!

حسني: الحب أخذ وعطا، لكن أنا باخد بس يا  
ولدي.

شريف: اللي أنت شايفه صح.. عايز تموت  
بإيه؟!!

حسني: بالمسدس يا ولدي اضربني طلقه  
ورичني!

شريف: زي ما تحب، خد البرشامة دي، في أي  
حد عايز تسيب له أي رسالة أو وصية؟!

حسني: أيوة عايزك تقول لأولادي أبوكم بيقول  
لكم شكرًا على كل حاجة عملتوها معايا، وقولهم  
إن أبوكم مات وهو راضي عنكم.

شريف: حاضر هبلغهم يا خالد.. فاضل كام حالة  
بره؟!

خالد: لسه فاضل ١٥ حالة يا دكتور.

شريف: طب كويس.. دخّل الحالة اللي بعدها!

خالد: مش هظبط الجهاز يا دكتور؟!

شريف: لا أنا اللي هظبطه للحج بنفسي، روح  
أنت زي ما قولتلك!

فتح

خالد: اتفضلني يا أنسة فرح!

فرح: هاي ازيك يا دكتور؟!

شريف: ودي عايزة تنتحر ليه.. من كتر الفرح ولا إيه..؟! ثواني يا أستاذة فرح وهكون معاك..  
آه اتفضلني اسم على مسمى فعلاً فرح ومليت  
الدنيا فرحة يا فرح.

فرح: شكرًا يا دكتور ده بس من ذوق حضرتك.

شريف: أنت أكيد حضرتك غلطت في العنوان،  
دكتور السنان العيادة اللي تحت على طول.

فرح: لا يا دكتور أنا جايه في العنوان الصح  
وجايه انتحر.

شريف: إيه كمية الثقة والفرحة اللي بتتكلمي بيها  
دي.. أنت جايه تنتحري مش جايه فرح!

فرح: آه عارفة.

شريف: أنتِ عارفة إنك جايه تنتحري، طب إيه  
السبب؟

فرح: تخيل يا دكتور عيد ميلادي كان امبارح!

شريف: طب يا ستي كل سنة وأنتِ طيبة.

فرح: أنتِ أول حد يقولي الكلمة دي.. مَفيش حد  
يا دكتور فاكر عيد ميلادي ولا بابا ولا ماما ولا  
إخواتي ولا صاحباتي، مَحدش مهتم بيا كإني  
مليش قيمة.

شريف: يعني أنتِ عايزة تنتحري عشان قلت  
الاهتمام؟!!

فرح: لا يا دكتور مش بالظبط كده في ناس بتهتم  
بيا.

شريف: طب طول ما في ناس بتهتم بيكِ أهو  
عايزة تنتحري ليه؟!!

فرح: علشان ألفت الانتباه يا دكتور الناس تعرف  
إني لسه عايشة.

شريف: يعني حضرتك عايزة تنتحري وتموتي  
علشان تلفت انتباه الناس علشان يعرفوا إنك  
عايشة صح؟!

فرح: صح يا دكتور.

شريف: صح إيه! يا خالد شغل الجهاز أنا اللي  
هنتحر والله لأسيبك العالم ده كله وامشي.. عايزة  
تموتي علشان تقولي للناس إنك لسه عايشة،  
الحالة دي مینفعش أنا أعملهك، دي خيال علمي  
يا فندم وده مش تخصصي.

فرح: لا يا دكتور أنت فهمت إيه؟! أنا عايز  
انتحر ومموتش.

شريف: صبرني يا رب! أعملهالك ازاي دي..  
أجيب كومبرس وأموته مكانك؟!

فرح: لا أنا عايزة أعمل محاولة انتحار لكن  
مَموتش.

شريف: آه.. عايزة محاولة انتحار فاشلة.

فرح: أيوة كده يا دكتور.

شريف: بس للأسف أنا كل محاولاتي ناجحة  
وبتموتّ على طول، مَفيش فيها فرصة تاني،  
نسبة الفشل صفر.

فرح: يعني أنت ممكن تموتني كده وهما هيعرفوا  
ويزعلوا عليًا وكده!

شريف: والله مَحدث هيزعل عليكِ ولا حاجة، ده  
احتمال بعد ما هخليكِ تنتحري باباكِ والدولة  
يكرموني على الإنجاز العظيم اللي أنا عملته ده.

فرح: متهزرش يا دكتور!

شريف: أنتِ اللي جايه تهزري يا فرح مش جاية  
تنتحري على فكرة.



فرح: لا يا دكتور أنا جايله انتحر وكمان اخترت  
طريقة الموت.

شريف: للأسف مَعندناش هنا طريقة الموت من  
الضحك خالص.

فرح: لا يا دكتور أنا عايزة أموت في حادثة  
عربية وأنا عمّاله أسجل فيديو وأقول لهم إني  
حببهم وأد إيه إنهم كانوا لطاف معايا أوي وأنا  
رايحة شوية وارجع لكم تاني علشان أعرف  
غلاوتي عندكم، وتيجي عربية من اللي هم  
بيمشوا على سرعة ٩٠ دول.. عارفهم يا  
دكتور؟! وتيجي تخبطني علي طول وأطير لفوق  
وانزل أخبط في الأرض بس الأرض لازم تكون  
أسفنج علشان متعورش ولا تحصلّي حاجة، وبعد  
كده أموت، بس عايزه كوافير علشان يفرد لي  
شعري كرياتين علشان وأنا في الخطبة شعري  
يكون خفيف ويفر فر معايا.

شريف: مش عايزة اللي يكون سايق العربية  
مهند؟!

فرح: ياريت يا دكتور أنا بحبه أوي ونعمل  
حادثة ونسميها حادثة مهند وفرح.

شريف: ربنا يديني وأقدر أحققك كل اللي في  
خيالك ده علشان ده صعب على أمثالي، بقولك  
أنتِ تاخدي البرشامتين دول، اتنين إيه دول ولا  
يعملوا معاك حاجة، أنتِ تاخدي الشريط كله يا  
دوبك يكفيك وهدخلي جوّه الجهاز ده.

فرح: طَبّ والفيديو يا دكتور؟!

شريف: الجهاز كده كده بيصورك فيديو  
متقلقيش، ادخلي وقولي اللي أنتِ عايزاه، عايزة  
حاجة تاني قبل ما تموت؟!

فرح: آه ده موبايلي من غير باسورد عايزاك  
تاخذ الفيديو وتنشره وتعمل إعلان ممول ب٥٠٠  
جنيه، خلي الناس كلها تعرف إنني مُت.

شريف: الحمد لله، أول حاجة أعملها صح من  
ساعة ما اتخرجت، أنا خلصت العالم من البنت  
دي، جاهزة يا فرح!؟

فرح: يلاً يا دكتور ابدأ!

شريف: أبدأ..! آه ما احنا في الملاهي، يا خالد  
اللي بعده وشوفلنا حد عاقل علشان خاطري.  
خالد: اتفضل يا زول وديع دفع الله!

# وادیج

شريف: أهلاً ببيك يا وديع، منور مصر.

وديع: أهلاً يا معلم.

شريف: معلم إيه يا وديع أنا دكتور.

وديع: عارف أنا إنك أنتِ دكتور شاطر وأنا  
جايلك علشان أتخلص من حياتي.

شريف: وعايز تنتحر ليه يا وديع!؟

وديع: الموضوع كبير يا دكتور .

شريف: وأنا عايز أسمع.

وديع: أنا كنت عايش في السودان بلعب مع  
القديسة حقي وجه زول مصري وحكائي عن  
عمل عندكم هنا في مصر، فرحت كتير يا دكتور  
إنني ماشي على مصر وفضلات أرقص طول  
الطريق وجيت إلى القاهرة - بيت المعز لدين الله  
الفاطمي، وكنت حابب مصر كتير يا دكتور

واشتغلت عندكم هنا في بدر والعاصمة وكنت  
عايش معاكم هنا في الموسكي.

شريف: طب كلامك كله حلو طب عايز تنتحر  
ليه؟!!

وديح: بسببكم أنتم يا مصريين أنتم تجنبوا الزول  
يا دكتور.

شريف: يعني أنت عايز تنتحر بسبب المصريين  
وبس، مَفِيش أي سبب ثاني؟!!

وديح: موجود سبب آخر يا دكتور.

شريف: إيه هو بقا السبب ده؟!!

وديح: الهجرة يا دكتور، أنا كنت عايش في  
السودان برعه جداده (دجاجة) حقي وكنت عايش  
في هدوء وراحة يا دكتور، لكن أنتم بلدكم زحمة  
خالص يا دكتور، أنت ازاي عايشين هنا أنا مش  
مستحمل العيشة دي وأسألتكم يا دكتور أسئلة

غريبة خالص، أنا مش قادر أفهم كنت ماشي في  
مدينة بدر شُفت عربية لبسه في بعضها، أتى  
زول مصري وقال دي حادثة، يا حبيبي هما في  
موسم التزاوج بس يا معلم ليه يا دكتور شريف  
بتطروقوا باب الحمام وهو مغلق؟!

شريف: علشان اللي جوّه يخلص ويطلع.

وديّع: شنو يا دكتور عم بتقول هو لما يخلص إيه  
اللي ينتظاره بالداخل بيخترع بتحبي ماما ولا  
بابا، أنا زول كبير يا دكتور يجيني زول تبعكم  
يقول لي بتحبي ماما ولا بابا ليه يا دكتور.. ليه يا  
دكتور ليه بتصحوني وأنا نايم وتقول لي أنتِ  
نمتِ؟! لا يا معلم بتدرب على الغيوبة.. ليه لما  
أسالك سؤال يا مصري ترد عليًا بسؤال تاني..  
ليه لإما تجيب لإما متجاوبش؟! لكن ما تردي  
تاني بسؤال تاني ليه؟!

شريف: أنت شاييل من المصريين أوي يا وديّع.

وديع: كثير كثير يا دكتور شريف، يعني أنت  
عايز تنتحر علشان الهجرة وتغيير المكان  
والتعامل مع الناس، بس كده ولا في حاجة  
تاني؟!!

وديع: أنتم هنا يا مصريين متغيريين كثير مع  
السودانيين.

شريف: بالعكس احنا بنحبكم احنا كده كده دولة  
واحدة، مصر والسودان مش كانت دولة واحدة!

وديع: ده كان زمان يا دكتور، لكن دلوقتي أنتوا  
يا مصريين بقيتوا صعبين خالص مع السودانيين.

شريف: طب في أي حاجة تاني بتعاني منها في  
مصر وعايز تقولها؟!!

وديع: كفاية كده يا دكتور.

شريف: ماشي خد البرشامة دي وقول أنت عايز  
تنتحر بيها؟!!



وديعة: أنتِ موتني بالشنق.

شريف: تمام في أي حاجة عايز تقولها لحد أو  
تسيب وصية لحد أو أي حاجة قبل ما تموت؟!!

وديعة: آه ياريت متسرقوش أعضاءي بعد ما  
أموت علشان عندنا في السودان بيخبرونا ندير  
حالنا واحنا في مصر علشان أنتوا بتسرقوا  
الأعضاء.

شريف: لا متخافش موت أنت وأنا همدفنك بكل  
أعضائك، واحنا مش بنسرق أعضاء، توصل  
بالسلامة يا وديعة، اللي بعده يا خالد!

خالد: اتفضلني يا مدام هايدي.

# هائپدېي

شريف: ازيك يا مدام هايدي؟!!

هايدي: أنا كويسة يا دكتور وأنا بشارك معاك في نظريتك المحترمة دي، وبكل فخر أفخر بأني هكون جزء من نظريتك.

شريف: ده فخر لينا إننا تكوني جزء من النظرية.. بس أنت شخصية حلوة ومشجعة كده وأنا شايف فيك حماس للحياة، عايزة تنتحري ليه؟!!

هايدي: عايزة أشوف ابني تاني!

شريف: هو مات ازاي..؟! لا أهدي كده يا هايدي واحكي لي موضوع ابنك ده من الأول خالص، ولا أقول لك.. احكي لي من يوم الفرح اسم جوزك كان إيه؟!!

هايدي: معاذ.

شريف: ومعاذ ده اتجوزتیه عن حب ولا  
صالونات؟!

هايدي: عن حب.

شريف: طب كويس خالص احكي لي بقا  
اتعرفتوا على بعض ازاي، وفترة الخطوبة كانت  
قد إيه، واتجوزتوا امتى؟!

هايدي: أنا قابلت معاذ في الجامعة، اتكلمنا مع  
بعض وارتحنا في الكلام وارتبطنا سنة، وبعدها  
انقدملي رسمي واتجوزنا بعد ست شهور من  
الخطوبة .. اتجوزنا وعشنا أنا وهو أجمل سنتين  
في حياتنا لحد ما جه نورتنا خالد، وبعد ما جه  
خالد بست شهور الدكتوراة اكتشفت إن عندي  
كنسر في الرحم واضطريت أعمل عملية  
استئصال الرحم.

شريف: ومعاذ كان موافق على العملية دي؟!

هايدي: موافقته مَكنتش هتفرق معايا، أنا قدام  
عملية لإما هعملها لإما هموت، فاخترت أعيش  
لابني و عملت العملية.

شريف: ومعاذ كان رده إيه بعد العملية؟!!

هايدي: زعل شوية، لكن بعد فترة الموضوع  
اتنسى ورجعنا زي الأول وكان خالد بيكبر قدام  
عيني والفرحة كمان بتكبر معاه، ووصل لحد ما  
دخل الحضانة وبعد كده ابتدائي ووصل لحد  
رابعة ابتدائي، وفي الإجازة روحنا نصيف أنا  
وهو وبابا، وعلى البحر وهو بيعوم الميّه سحبتوا  
والبحر بلعوا وقعدنا ٢٠ يوم ندور عليه في البحر  
والغواصين ينزلوا ويطلعوا لكن مَفيش فايده..  
كانت صدمة كبيرة ليّا يا دكتور، والنور اللي في  
حياتي اتطفى وعشت بعد كده أسوأ أيام حياتي.

شريف: طب ومعاذ؟!!

هايدي: بعد الحادثة بشهر لقيته باعتلي ورق  
مكتوب فيها اللي متعرفش تحافظ على ابنها أو  
متعرفش تجيب غيره يبقى الموت أحسن لها،  
أنتِ طالق يا هنام.

شريف: وأنتِ سمعتِ كلامه وجايه تنتحري!

هايدي: أسمع كلام مين.. ده ادعيه رينا يفك  
سجنه!

شريف: ليه أنتِ عملتِ فيه إيه؟!!

هايدي: بلغت عنه طبعًا.

شريف: ليه هو عمل إيه؟!!

هايدي: ضيعلي عمري.

شريف: فأنتِ قُلتِ أضيع له عمره هو كمان،  
وديتيلوا كام سنة بقا؟!!

هايدي: تأبيدة.

شريف: ليه كده يا مفترية؟! ٢٥ سنة حرام عليك، ليه أنتِ بلغتِ عنه في إيه؟!!

هايدي: هيروين يا دكتور، تصدق إنه كان بيتاجر في الهيروين الوحش ومعايا كيس كمان.. تحب تجرب وأخليك تسليه في السجن؟!!

شريف: طب هو جوزك ويستحملك أنا ذنبي إيه؟!!

هايدي: ذنبك إنك بتدّخل في اللي مَلَكش فيه.

شريف: لا أنا لازم أعرف أنتِ عايزة تنتحري ليه قبل ما أخليكِ تجربي الجهاز علشان ما أخدش ذنب!

هايدي: ابني مات يا دكتور، نور حياتي مات وأبوه كمان اعتبره مات وأنا نفسي أشوف ابني تاني، وحشتني منه كلمة ماما اللي عمري ما هسمعها تاني في حياتي .. أنا مش قادرة أعيش من غير ابني و هو كمان أكيد مش قادر يعيش

من غيري، أنا عايزة أروحه واحضنه أنيمه في  
حضني تاني ويحكي لي على مشاكله تاني  
واذاكرله واضربه ويملا حياتي نور تاني.

شريف: ابنك يا هايدي عند الأحسن مني ومنك،  
وهو هناك مش محتاجك.

هايدي: لا هو محتاجني وأنا استحالة أسيب ابني  
لوحده، مش هقدر أسيبه ولا دقيقة تاني خلاص،  
أنا عايزة أموت زي ما ابني مات، فين الجهاز ده  
يلا..!

شريف: استني أنتِ مستعجلة على الموت ليه؟!  
خدي البرشامة دي!

هايدي: برشامة إيه؟!

شريف: دي برشامة بتخفف عليكِ ألم الانتحار.

هايدي: لا أنا مش هاخذ حاجة، أنا عايز أتعذب  
زي ما ابني اتعذب بالظبط.



شريف: لو ما أخذتيش البرشامة دي مش هتنتحري.

هايدي: قولتلك مش هاخذ حاجة، ولو طلعت برّه الجهاز هبلغ عنك دلوقتي.

شريف: ليه وعلى إيه كل الحوارات دي! على راحتك.. عايزة تسيبي وصية ولا أي حاجة؟! هايدي: انجز عايزة أشوف ابني.

شريف: ماشي مع السلامة.. يا خالد دخل الحالة اللي بعدها.

خالد: اتفضل يا أستاذ سالم!

شريف: زوّد المادة اللي في الأكسجين الضعف يا خالد عشان المريضة رفضت تاخذ البرشام!

خالد: حاضر يا دكتور.

سالم

شريف: منور يا سالم.. ايه مشكلة شاب جميل  
زيك تخليه ينتحر؟!

سالم: أمم..

شريف: آه فهمتك خلاص.. خد الباب في إيدك يا  
خالد.. أهو خرج عايز تنتحر ليه؟!

سالم: عايز انتحر وخلص وانجزني!

شريف: كلكم مستعجلين على الموت ليه؟! على  
فكره هو مش هيخلص ولا هيطيير كلكم  
هتفرطوا النهاردة، بس لازم أعرف أنت عايز  
تنتحر ليه؟!

سالم: موضوع شخصي.

شريف: حب ولا علاقات يا سيدي! ما احنا كلنا  
حبينا وعمانا علاقات وبردو مَكْمَاناش فيها،  
وعارف اللي هتقوله علشان أنا مريت  
بالموضوع ده قبلك، لكن أنا عايز اسمعك!

سالم: لا يا دكتور مش حب بس موضوع شخصي.

شريف: يعني عندك مشكلة عائلية يا سيدي، بسيطة.. كل البيوت فيها مشاكل وكله مع الوقت.

سالم: لا يا دكتور أنا مَعديش مشاكل عائلية، وأنا عايز انتحر وأرجوك مَترجرنيش في الكلام أكثر من كده علشان أنا مش هقول حاجة أبدًا! شريف: خلاص فهمت اعتداء صح؟!

سالم: قولتلك أنا مش هقول حاجة، عايز تخليني أنتحر عندك ولا أروح انتحر برّه؟!

شريف: ده حتى عيب.. ده مكانك يا سالم تيجي تنتحر في الوقت اللي أنت تحبه، بس يا باشا أنا عايز أعرف منك شوية معلومات صغيرة علشان أخليك تنتحر.

سالم: أنا مش هقول أي حاجة يا دكتور، عايز تموتتي موتتي.. مش عايز بلاش، لكن أنا كلام مش هتكلم.

شريف: أنا مش عايزك تتكلم أنا عايزك تجاوبني بأية ولا لا بس.. اتفقنا!! والسؤال اللي مش عايز تجاوبه هزلي براسك وأنا أسالك غيره ماشي؟!!

سالم: ماشي يا دكتور.

شريف: اللي عمل الجريمة دي أكبر منك ولا أصغر؟!!

سالم: أكبر.

شريف: كان غصب عنك ولا برضاك؟!!

سالم: غصب.

شريف: الموضوع ده بقاله كام سنة؟!!

سالم: شهرين.

شريف: شوفت الشخص ده طول الفترة دي؟!!

سالم: أيوة.

شريف: لما شوفت الشخص ده عملت إيه؟!!

سالم: روحت البيت واستخببت منه.

شريف: طب تمام أوي كده الشخص ده يبقى  
راجل ولا ست؟!!

سالم: راجل.

شريف: خلاص مش عايز أعرف منك حاجة  
تانية، الموضوع كله إن في راجل عنده نقص  
واضطرابات في خلايا المخ المسؤولة عن  
الجنس فبيكمل النقص ده بالاعتداء على اللي من  
نفس الجنس.. وأنت كنت واحد من المعتدين  
عليهم .. عايز تسبب لأي حد حاجة قبل ما  
تموت؟!!

سالم: لا.

شريف: خد البرشام.. متخافش.. خد البرشامة  
وادخل جوّه الجهاز ده وأقل من ٥ دقائق وهيكون  
الموضوع انتهى، حابب تموت بإيه؟!

سالم: اقطع شرياني!

شريف: ماشي يا سالم زي ما تحب، اللي بعده يا  
خالد!

خالد: اتفضل يا عمر!





شريف: عمر اسم جميل ما يلقيش أبدًا على  
الانتحار، عايز تنتحر ليه يا عمر؟!

عمر: علشان كثير أوي.. فاضل تسمع؟!

شريف: أنا جاي هنا أساسًا علشان أسمعك، قول  
كل اللي في قلبك!

عمر: ما سألتش نفسك أبدًا يا دكتور أهلك علموك  
ليه، ودخلوك مدارس بعد كده ثانوي بعد كده  
الكلية وصرفوا عليك دم قلبهم كل ده ليه؟!

شريف: مش عارف أنت عندك إجابة؟!

عمر: أيوة.. أهلنا بيعملوا ده كله علشان عايزين  
يشوفونا أحسن منهم، عايزين يشوفوا ثمرة  
تعبهم، عايزين يشوفوا الشجرة اللي كانوا  
بيصرفوا عليها كل يوم طرحت إيه!

شريف: وأنت بقا طرحت إيه؟!

عمر: لا أنا ما طرحتش، أنا مُت ومُت أكثر لما  
فضلت أدور على شغل وما لقيتش، أيوة مُت لما  
يبقى عندي ٢٩ سنة ولسه باخد مصروف من  
أبويا، يبقى مُت يا دكتور.

شريف: يعني أنت مشكلتك في الفلوس ولا في  
الشغل؟!

عمر: الاتنين، ما هو لو في شغل هيبقى في  
فلوس، لكن مَفيش شغل هتيجي منين الفلوس!

شريف: طب ما تدور تاني وتالت ورابع لحد ما  
تلاقي شغل!

عمر: أنت مش عايش معانا في سوق العمل يا  
دكتور، دلوقتي الناس بتطلب طلبات غريبة  
علشان يرضو يشغلوك.

شريف: زي..!

عمر: عدد عندك عايزين معاك لغتين ومعاك  
رخصة قيادة وبتعرف تتعامل مع الكمبيوتر  
وورد وإكسيل ومتفرغ للعمل وتقدر تشتغل تحت  
ضغط نفسي وعصبي، وتقدر تسافر لفترات  
طويلة، عايزينك تعمل المستحيل علشان تقبض  
١٨٠٠ جنيه في الشهر يعني ٦٠ جنيه في اليوم،  
ال ٦٠ دول ميجيبوش علبتين سجاير يا دكتور،  
مش بقولك أنت مش عايش معانا في سوق  
العمل.. واللي يحرق دمك ويخليك بدل ما تنتحر  
مره تنتحر مليون مرة، إن تيجي تلاقى شغلانة  
ب ٣٠٠٠ جنيه وشغل مرتاح تلاقىهم طالبين  
بنات حسنة المظهر، طب وانا أروح يطلع عيني  
علشان ١٨٠٠ والبنات تاخذ ٣٠٠٠ جنيه علشان  
حسنة المظهر بس.. وكم ان إيه ولا لغتين ولا  
رخصة ولا أي حاجة مطلوبو، تبقى حاجة واحدة  
بس حسنة المظهر، يبقى الواحد يعيش في الزمان  
ده ازاي..؟! زمان كانت الستات بتطالب  
بالمساواة بين الرجل والمرأة، وأنا النهاردة

راجل بطالب المساواه بيني وبين المرأة في العمل.

شريف: أنت اشتغلت إيه قبل كده يا عمر!؟

عمر: اشتغلت صبي جزار واشتغلت مساعد كهربائي ومساعد نقاش ومندوب مبيعات، واشتغلت بائع متجوّل واشتغلت في الدعاية واشتغلت عامل نظافة واشتغلت فرد أمن واشتغلت سواق توك توك، ومخّلتش حاجة مَشْتَغَلْتَش فِيهَا.

شريف: طب ليه كنت بتسيب كل الشغل ده، ما ركزتش ليه في مجال واحد وكملت فيه!؟

عمر: كله عايزني يوم ولا يومين، وبالكتير أسبوع علشان مزنوق في شغل، أو اللي معاه نزل إجازة، كان نفسي أثبت في أي شغلانة، لكن للأسف كُنت دايماً سد خانة أو بديل أو عامل

مؤقت، مَفِيش شغلانة جَتِّي أكون فيها أساسي يا  
دكتور.

شريف: طب ما تَدِّي نفسك فرصة ودور ثاني!

عمر: معاك فلوس يا دكتور ومش عايزها  
تديهاني، علشان لو منتحرتش النهاردة أجيب بيها  
أكل، وأكل نفسي لحد ما أموت بكره بسبب إني  
مش معايا فلوس أجيب بيها حتى الأكل، أنا مش  
طالب أكل فراخ ولا لحمة، أنا نفسي بس في  
رغيفين عيش وقرص طعمية تبقى الحمد لله،  
معاك فلوس يا دكتور!؟

شريف: معايا طبعًا.

عمر: طب حافظ عليها علشان ميجيش عليك يوم  
وتبقى في مكاني، الفلوس لو ضاعت مش  
هترجع لك ثاني، حافظ على فلوسك يا دكتور!

شريف: يعني أنت خلاص مقرر!؟

عمر: أنا هموت نفسي، أنا هروح مكان عالي  
أوي.. أعلى مكان في مصر، أنا هروح وهرمي  
نفسى من برج القاهرة، أعلى مكان.

شريف: ولا تروح برج القاهرة ولا تتعب نفسك،  
أنا جبنتك البرج لحد عندك، خد البرشامة دي  
وادخل جوّه الجهاز اللي هناك ده.. شايفه!

عمر: أيوة يا دكتور.

شريف: أهو ادخله هتلاقي نفسك في البرج  
وارمي نفسك براحتك، في حاجة عايز تقولها ولا  
تسيبها لأي حد قبل ما تموت يا عمر!؟

عمر: سايب الذكرى الحلوة.

شريف: طب جدع.. اللي بعده يا خالد!

خالد: اتفضلي يا أستاذة هدير!

مکاتیب

شريف: اتفضلي عندك إيه؟!!

هدير: ولا حاجة.

شريف: طب عايزة تنتحري ليه؟!!

هدير: عايزة أروح المكان اللي راح فيه أبويا،  
أبويا مات يا دكتور، مات اللي سندي وضهري،  
مات أغلى حاجة في حياتي، مات اللي كنت لما  
بترمي في حضنه بنسى الدنيا كلها، مات وأنا  
لسه محتاجاه.

شريف: اهدي يا أستاذة هدير، اهدي احنا لسه في  
أول الحوار ولسه الموضوع معانا هيطوّل، اهدي  
كده مشكلتك إني باباك مات صح؟!!

هدير: أيوة بس.

شريف: لا بس متكلميش.. فضّي الجهاز يا خالد!

هدير: بس أنا عايزة اتكلم يا دكتور.



شريف: لا أنا عارف كل الكلام اللي أنتِ  
هتقوليه، علشان أنا مش بيّاع بطاطس هنا، شغل  
الجهاز يا خالد!

هدير: يعني أنت مش عايز تسمعني.. ما هو مات  
اللي كان بيسمعني، مات اللي كان بيّفهمني من  
عينيا قبل ما اتكلم مات..

شريف: ومات الحضن الدافي، ومات اللي كان  
كل أسراري معاه.. ومات ومات..

هدير: أنت عرفت منين إن هو كان الحضن  
الدافي وإني كل أسراري معاه؟!!

شريف: بصي يا هدير أنتِ جايّه لدكتور نفسي،  
فأنا عارف كل الكلام اللي أنتِ هتقوليه وعارف  
قد إيه الأب غالي أوي عند البنات، ومهما هقول  
مش هقدر أرجعك عن الطريق اللي أنتِ  
مختاراه، وأنتِ مش هترجعي، فأليه نضيع  
وقتنا؟!!

هدير: عندك حق يا دكتور.

شريف: بس أنا عندي سؤال صغير قبل ما تنتحري.

هدير: اتفضل!

شريف: بابا مات امتي؟!!

هدير: من ست شهور.

شريف: طب قبل ما بابا يموت كُنتِ في أي علاقة مع حد؟!!

هدير: دي حياتي الشخصية وأنا مسمحكش إنك تتدخل فيها.

شريف: حياتك الشخصية.. امم.. حضرتك دلوقتي هتموت، فاهمة يعني هتموت! يعني حتى لو قولتيلي على حاجة مش هعرف أمسكها عليكِ عشان أنتِ هتكوني ميتة فوق.

هدير: لا، بابا كان كل حاجة في حياتي  
ومفكرتش أحب غيره، كان مالي قلبي ومگنش  
مخليني أعرف أحب حد غيره.

شريف: وبعد ما مات في خلال الست شهور دول  
محدّش دخل حياتك؟!!

هدير: لا.

شريف: تمام ده آخر سؤال، بابا لما مات راح  
فين؟!!

هدير: راح السماء طبعًا يا دكتور.

شريف: طب وأنتِ لما تنتحري هتروحي فين؟!!

هدير: هروح عند بابا.

شريف: لا أنتِ هتروحي النار علشان أنتِ  
انتحرتِ، لكن بابا هيفضل في السماء زي ما هو.

هدير: ربنا هيرحمني يا دكتور علشان عارف  
اللي أنا بمر بيه من بعده.

شريف: طب ممكن تتراجعي على القرار ده؟!

هدير: لا.

شريف: طب حابّه تموتِ ازاي؟!

هدير: أموت غرقانة يا دكتور.

شريف: طب تمام.. شايفة الجهاز اللي هناك!  
ادخلي فيه.. أيوة كده شاطرة برافو عليكِ، في أي  
حاجة عايزة تسيبها لحد أو أي رسالة عايزة  
توصلها لحد قبل ما تموتِ؟!

هدير: اللي عايزة أوصله الرسالة أنا ربحاله  
دلوقتي.

شريف: موتة هنيئة، اقلب الحالة اللي بعدها يا  
خالد، ويا ريت يكون راجل يا خالد ارحم أمي!

خالد: حاضر يا دكتور انفضل يا فرغلي!

فرخانی

فرغلي: دكتور!

شريف: اتفضل يا أستاذ عايز تتحرر ليه؟!

فرغلي: بص يا دكتور أنا قريرت كويس عن  
الانتحار، وقريرت أكثر عن الناس اللي انتحرت  
قبل كده وإيه المشاكل اللي واجهتهم وخليتهم  
ينتحروا؟!

شريف: طب كويس ما أنت قاري وعارف أهو،  
أومال جيت تتحرر ليه؟!

فرغلي: ما هي دي المشكلة يا دكتور، كل ما تقرا  
أكثر كل ما الفضول يشدك أكثر، وطبيعة الإنسان  
يا دكتور بيحب يجرب الحاجات الجديدة.

شريف: يعني أنت جاي علشان تجرب حاجة  
جديدة! أمم للأسف كان نفسي أنا أنولك اللي في  
بالك لكن للأسف مش هتلق تجرب علشان أنت  
هتكون ميت أساسًا.

فرغلي: لا ما أنا مش عايز أجرب حاجة جديدة،  
أنا عايز أعيش القصة كلها لحد الموت.

شريف: ولما تموت يبقى استفتت إيه؟!!

فرغلي: يبقى استفتت إني عرفت وحسيت قد إيه  
هم كانوا بيعانوا علشان يموتوا.

شريف: تعرف يا فرغلي.. أنا هو افق إني أخليك  
تنتحر تعرف ليه؟!!

فرغلي: ليه؟!!

شريف: علشان أرحم نفسي والمجتمع والكرة  
الأرضية كلها ومجموع درب التبانة كلها من  
دماغك الخارقة، علشان أنت لو كملت عايش  
ممكن تكتشف حاجة وتأخذ نوبل عليها وتكون  
أنت زي الدكتور أحمد زويل، وده اللي أنا مش  
هسمحك بيه أبدًا.

فرغلي: صحيح يا دكتور أنا ممكن أخذ نوبل؟!!



شريف: أه صحيح، بص يا برنس شايف الجهاز  
اللي هناك ده ادخل هتلاقي فيه بنت جوّه ارميها  
برّه الجهاز وادخل مكانها على طول، أيوة كده  
انجز حالك الموت هيفوتك وأنا عايزك تجيب  
الموت من الأول.. تحب تموت بابه يا فرغلي؟!

فرغلي: بص هي كل القصص يا دكتور ماتت  
مشنوقة، فأنا ممكن أموت مشنوق زيهم.

شريف: طب عايز تقول حاجة قبل ما تموت أو  
تسيب رسالة لحد؟!

فرغلي: أيوة طبعا، اللي أنا هعمله ده عمل  
بطولي أنا بضحي بنفسي علشان أوصل للناس  
شعور الانتحار عامل ازاي.. فلازم الدولة بعد  
التجربة دي تكرمني ويعملولي ميدان باسمي  
وكمان مدرسة وكمان.. أه ه ه ه..

شريف: اخلص يا جدع ما نسمي النشيد الوطني  
باسمك أحسن، يا خالد مش أنا قوتلك ارحم

أمي.. يعني أنا مش بصعب عليك يا خالد، قولتلك  
دخلّي راجل علشان يحكي لي على موضوع  
يستاهل الانتحار مدخلي فرغلي!

خالد: ماله فرغلي يا دكتور؟!

شريف: لا ولا حاجة يا حبيبي هو بس كان عايز  
ينتحر علشان يجرب إحساس الانتحار عامل  
ازاي ومش همه يموت أنت فاهم، وكمان عايز  
مدرسة وميدان باسمه علشان هو عمل عمل  
بطولي.

خالد: وماله.. ربنا يقوينا يا دكتور.. والمرة دي  
هدخل لك بنت ملكة جمال، أميرة واسمها أميرة.

شريف: دخلها لما نشوف إيه مشكلتها!

أميرة

خالد: اتفضلي يا أستاذة أميرة!

شريف: معقول القمر ده لابس أسود.. ليه؟!

أميرة: ...

شريف: أنت مَبترديش عليًا ليه يا أميرة؟!

أميرة: بص يا دكتور أنا جايه هنا علشان أنتحر..  
فاهم! أنا جايه هنا علشان أنتحر، يبقى تقعد زيك  
زي المكتب اللي حضرتك قاعد عليه ده لحد ما  
أموت!

شريف: طب تمام عايزة تنتحري ليه؟!

أميرة: الحياة وحشة.

شريف: أيوة هي فعلاً وحشة عندك حق، طب إيه  
أكثر حاجة شايفها وحشة في الحياة؟!

أميرة: إنك ما يكونش في حاجة عايز تعيش  
علشانها.

شريف: تمام أنتِ دخلتِ في علاقة قبل كده؟!!

أميرة: من تلت سنين.

شريف: تمام وبعد التلت سنين إيه اللي حصل؟!!

أميرة: اتجوزت.

شريف: حد تاني؟!!

أميرة: لا نفس الشخص.

شريف: طب دي حاجة ممتازة إنك تتجوزي عن حب.

أميرة: هي فعلاً كانت حاجة ممتازة.

شريف: وليه كانت.. هو خانك أو حاجة؟!!

أميرة: لا.

شريف: أو مال إيه؟!!

أميرة: ساعات الجواز بيدمر قصص حب، وعلى فكرة دي معلومة ليك يا دكتور، الحب من غير جواز أفضل مليون مرة من إنك تحب وتتجوز.

شريف: ليه بتقولي كده؟!!

أميرة: أنا هقولك ليه.. علشان وأنت بتحب بتتهم بحبيبك وبيكون هو كل حاجة في حياتك، بتظمن عليه كل شوية، بيزعل على زعلي ومبينامش غير لما يسمع صوتي.

شريف: تمام وبعد الجواز الحاجات دي استمرت؟!!

أميرة: لا بعد الجواز الحياة بتكون مصالح، كلام حلو علشان علاقة اهتمام علشان أكل، لكن حب مَفِيث، الحب قبل الجواز هو الحب لكن الحب اللي بعد الجواز ده ما اسمهوش حب ده اسمه مصلحة.

شريف: وبعد كده؟!!

أميرة: ولا حاجة اتخانقت.

شريف: وإيه سبب الخناقة؟!

أميرة: دي أسرار بيوت.

شريف: طب جميل أوي، ما أنتِ أهو محافظة  
على سره، يعني أنتِ لسه بتحببيه!

أميرة: اللي بحبه كان في الخطوبة مش جوزي.

شريف: هما الاتين نفس الشخص على فكرة، بس  
المشكلة المسؤولية مش أكثر، المهم اتخانقتوا  
وعملتِ إيه بعد كده؟!

أميرة: ضربني بالألم.

شريف: وطبعًا أنتِ خدتِ بعضك وروحتِ  
وانفصلتِ.

أميرة: لا استحملت علشان بحبه، لكن هو زاد  
فيها وكان كل يوم بيضربني لحد ما عرفت إن

الشخص اللي كنت بحبه مش هيرجع تاني  
ورحت عند ماما وقعدت عندها ٥ شهور، ولا  
بشوفه ولا ببشوفني.

شريف: طَب ما حاولتيش تتواصلي معاه؟!!

أميرة: حاولت أكثر من مرة، لكن للأسف حسيت  
إني برخص نفسي أكثر وأكثر كل مرة أكلمه  
فيها.

شريف: فانفصلتوا؟!!

أميرة: انفصلنا.

شريف: وبعد كده هو عمل إيه؟!!

أميرة: اتجوز.

شريف: وأنتِ اطلقتِ؟!!

أميرة: لا رفض يطلقني.



شريف: طب ما فكرتيش ترفعي عليه قضية  
خلع؟!

أميرة: واخعه ليه ما أنا اللي هخلع من الدنيا دي  
كلها دلوقت!

شريف: آه تمام، طب ممكن تدي لنفسك فرصة  
تاني وتفكري وتقرري؟!

أميرة: أنا خلاص مقررة.

شريف: طب أنت بتعيطي ليه؟!

أميرة: علشان سنين اللي عشتها معاه واحد ما  
يستاهلش وهموت، كمان علشان نفس الواحد اللي  
ما يستاهلش.

شريف: طب ما احنا لسه فيها، ممكن ناخذ  
فرصة تاني ونحب تاني ونجرب تاني، واللي  
جاي هيكون أحلى أكيد من اللي راح.

أميرة: اللي جاي عمره ما هيكون زي اللي راح  
أنا مقررة يا دكتور.

شريف: عايزة تموتِ بابه يا أميرة؟!!

أميرة: اقطع شراييني يا دكتور.

شريف: تمام ادخلي الجهاز اللي هنا ده تمام، في  
أي رسالة حابه تقوليها لأي حد بعد ما تموتِ  
نوصلها؟!!

أميرة: أيوة قول لخالد إني عمري ما حببت ولا  
هحب حد غيرك، وأنا مموتش دلوقتي، أنا مُت  
من خمس شهور لما انفصلنا، وقوله إني كنت  
مستنياه كل يوم وبعد الساعات والدقايق علشان  
أشوفه، وحتى وأنا بموت كان نفسي أشوفه  
وأموت وأنا بين إيديه.

شريف: تمام هوصل له الرسالة يا أميرة.. اللي  
بعده يا خالد.. خالد أميرة كانت متجوزة واحد  
اسمه خالد او عى تكون أنت.

خالد: يا ريتني وأنت كنت موتنا مع بعض، حد  
يسيب القمر ده يموت لوحده، أنت قلبك قاسي  
أوي يا دكتور.

شريف: مخصوم منك يومين، يلاً روح شوف  
أكل عيشك ودخل الحالة بعدها.

خالد: يومين.. يا رب يا شريف أدخلك الجهاز ده  
بايدي!

شريف: بتقول حاجة يا خالد؟!!

خالد: لا يا دكتور بقول أدخلك أستاذ ماهر..  
اتفضل يا أستاذ ماهر، أيوة كده خليه يتربى  
عشان يعرف يخلص بعد كده.

شرفیخت

شريف: ازيك يا أستاذ ماهر عامل إيه؟!!

ماهر: بلا ازيك بلا نيلة، أنت واقف كده ليه ما  
تترزع تقعد!

شريف: حاضر يا فندم هقعد بس أنت ليه عصبي  
كده؟!!

ماهر: أنا مش عصبي.

شريف: أو مال إيه يا فندم؟!!

ماهر: الدنيا هي اللي عصبية، أنت مش فاهم  
حاجة أنت لسه عيل صغير مَتفهمش الكلام اللي  
أنا بقوله ده.

شريف: طب ممكن تفهمني؟!!

ماهر: أفهمك.. وتطلع مين أنت علشان أفهمك؟!!  
حتة عيل صغير ملهوش عازة ولا راح ولا جه  
وقاعد تتكلم معايا.

شريف: العيّل الصغير ده اللي حضرتك جاي له  
برجلك علشان يموتك، أنت عايز تنتحر ليه؟!

ماهر: وأنت مال أهلك، أنتحر زي ما أنا عايز،  
أنت هتحاسبني ولا إيه؟!

شريف: لا لا يا فندم مقدرش أحاسبك طبعًا، بس  
استحملني ثواني بس يا خالد هات كوباية ليمون  
ليا، ويا ريت لو تجيب شجرة الليمون كلها  
للأستاذ ماهر بس بسرعة يا خالد!

خالد: حاضر يا دكتور.

شريف: طلبتك كوباية ليمون معايا يا أستاذ ماهر  
علشان تهدي أعصابك.

ماهر: تاني يقولي هدي أعصابك، ما أنا هادي  
أهو أنت شوفنتي بتنطط قدامك!

شريف: لا يا فندم مقدرش أقول كده، اتفضّل  
الليمون، خد الباب وأنت خارج يا خالد، اتفضّل  
يا أستاذ ماهر، ها بقا عايز تنتحر ليه؟!!

ماهر: من اللي بيحصل ده.

شريف: إيه اللي بيحصل احكي لي.. ماهر أنا  
زمان في التسعينيات كنت عايش في الفيوم بلدي  
وبلد أجدادي، الفيوم حلوة أوي يا دكتور.

شريف: طب تمام وسيبت الفيوم ليه يا أستاذ  
ماهر؟!!

ماهر: غصب عني، أنا لو كان بإيدي كنت عشت  
لحد ما أموت في الفيوم، لكن أعمل إيه.. التكليف  
بتاعي جابني في القاهرة.

شريف: طب ما القاهرة حلوة بردو يا أستاذ  
ماهر.

ماهر: اتنيل أنت عارف حاجة.. القاهرة بتاعتك دي ولا تساوي أي حاجة بالنسبة للفيوم، أنتم صعبانين عليا أوي.

شريف: ليه يا أستاذ ماهر!؟

ماهر: علشان أنتم عايشين عيشة متتعاش.

شريف: ليمون بسرعة يا خالد!

ماهر: مش عايز ليمون تاني، أنت عارف وأنا في الفيوم كنت استحالة تتعصب، الجو حلو فراغ طبيعة خلابة، لكن هنا مَفيش أي حاجة من ده، كله هنا دوشة وزيطة وكله بالوقت، هنا لازم تشتغل شغلنتين وتلاتة علشان تعرف تعيش، لكن عندنا في الفيوم حتى لو مش شغال هتتعرف تعيش علشان اللي بنزرعوا بنكلوا، وشوية اللبن والجبنة، في البيت مبيخُلُوش والحاجة فيها بركة لكن هنا أنتم بتتبعوا جرجير، الجرجير بيتباع يا



بشر ازاي، عندنا الناس بتزرعه علشان تاكله  
وتأكل منه الناس كلها وأنتم هنا بتبيعوه.

شريف: طب مفكرتش ترجع الفيوم تاني يا أستاذ  
ماهر؟!!

ماهر: أرجع تاني ده كان زمان قبل ما عمري  
يضيع في البلد دي، أنت عارف أنا ليا كام سنة  
هنا في القاهرة؟!!

شريف: كام؟!!

ماهر: ٢٣ سنة.

شريف: طب وخلال ٢٣ سنة ما اتعودتش على  
الزحمة والزبطة اللي في القاهرة.

ماهر: ولا عمري هتعود عليها.

شريف: طب عايزني أساعدك ازاي علشان  
تتعود على القاهرة يا أستاذ ماهر؟!!

ماهر: أنا عايزة تساعدني وتموتني وتخلينا  
نخلص.

شريف: طب فِكر شوية.

ماهر: هتموتني ولا أقوم أقبض في زَمارة  
رقتك.

شريف: لو على إيه الطيب أحسن، ادخل الجهاز  
اللي هناك ده.. أيوة، وطّي وأنت داخل.. أيوة كده  
تمام، المهم عايز تسبب رسالة لحد أو تقول حاجة  
لحد قبل ما تموت!؟

ماهر: أيوة عايز أقول لكل واحد عايز يتغرب  
من بلده علشان أكل العيش أحسن لك اقعد في  
بلدك وأرضك ولو هتاكلها بملح او عى تيجي  
القاهره علشان تشتغل في القاهرة.. القاهرة دوامة  
يا ابني وغواية تدخل فيها وأنت عيل تطلع منها  
وأنت مسن، والأيام فيها بتجري ومش هتس  
بيها، يلا موتني خلينا نخلص!

شريف: عايز تموت بإيه يا أستاذ ماهر!؟

ماهر: عايز عربية تخبطني وتموتني وتنسيني  
الدوشة كلها اللي كنت عايش فيها.

شريف: تمام عايز حاجة تاني قبل ما تموت يا  
أستاذ ماهر!؟

ماهر: لا وانجز علشان لو مموتش هطلع اطريق  
لك الجهاز ده على دماغ اللي جابوك!

شريف: وعلى إيه مع السلامة، اللي بعده يا خالد!

خالد: اتفضلني يا أستاذة سارة!

# مادة

شريف: اتفضلي يا أستاذة سارة، على فكرة اسم ساره ده غالي عندي أوي.

سارة: أنا حامل.

شريف: حامل من مين أنا لسه بعترفلك إنك اسمك غالي عليا تقوليلي حامل، أو مال لو قولتلك بحبك تقوليلي إيه.. روح مع الولد بكره تقدمله على ورق الجيش؟!!

سارة: لا يا دكتور أنت فهمتني غلط، أنا حامل من جوزي.

شريف: طب ممتاز، متجوزة وحامل كمان، إيه المشكلة..؟! شوية ربنا هيكرمك بينت أو ولد يملا عليك الدنيا وتربيته تربية حلوة ويكبر قدام عينيك وتفرحي بيه وتجوزيه وتشيلي عياله كمان، وبعد كده متستعجلش هتموتي إيه مشكلتك بقا؟!!

سارة: أنا مش عايزة أخلف يا دكتور.

شريف: خلاص متخلفيش.

سارة: أنت بتقول إيه يا دكتور؟!!

شريف: أنتِ اللي بتقولي إيه؟! أنتِ مش متجوزة  
وحامل بيقى هتخلفي أو مال اللي في بطنك ده  
هتعملي فيه إيه?!!

سارة: ما أنا كنت بفكر في الإجهاض قبل ما  
أشوف إعلانك عن فكرة الفرفطة، فقلت بدل ما  
أموته وأخذ ذنبه نموت مع بعض.

شريف: ده إعلان نموت مع بعض بدل دايمًا مع  
بعض ولا حضرتك عايزة تاخدي العرض..  
ذنبك وذنب ابنك تحبي حضرتك أضيفلك ذنب  
جوزك كمان، ولا تحبي الذنبيين دول بس؟! أنا  
هنا فاتح المطعم علشان خدمة حضرتك.

سارة: مطعم إيه يا دكتور دي عيادة?!!

شريف: لا ما أنا خلاص هسيب الطب كله  
واشتغل فكهاني، تحبي الموز بقشره من غير  
قشرة؟!!

سارة: أنت بتقول إيه يا دكتور أنا مش فاهمك؟!!

شريف: طب كويس أنا كده قادر أوصلك المرحلة  
اللي أنتِ مخلياني فيه، أنا مش فاهمك، نفس  
مكانك وأنتِ بقيتِ مكاني أنتِ فهمتِ منِّي حاجة  
من اللي فاتت؟!!

سارة: لا.

شريف: ولا أنا فهمت من الموضوع حاجة، يبقى  
من أوّل وجديد وعايزة تنتحري ليه؟!!

سارة: علشان ما أخلفش، عايزة أعيش كده  
بالكامل أنتي ورشاقتي وجمالي.

شريف: تمام أنا ممكن دلوقتي أطلع أقدملك على نوبل حالاً لو قولتيلي إنك ازاي هتقدري تعيشي بأنتتك وجمالك ورشقتك بعد ما تنتحري!

سارة: لا يا دكتور ما أنا لما هنتحر ممكن أموت.

شريف: ياه سبحان الله، أخيراً بس في نقطة مش وضالك، مَفيش ممكن أنتِ هتموتي فعلاً.

سارة: طب تمام يلاً!

شريف: يلا فين.. أنت طالعة رحلة؟! يا مدام أنتِ رايحة تنتحري، لو مَفيش سبب مقنع أنا مش هقدر أخليكِ تنتحري.

سارة: كل كلامي اللي فات ده مش مقنع؟!!

شريف: هو حضرتك قولتِ حاجة أساساً!

سارة: أنا عايزة أنتحر يا دكتور علشان مش عايزة أخلف، مش عايزة أبقى أم، مش عايزة أشوف نفسي بكرش، مش عايزة أفقد أنتي أو



جمالي، كل ده مش سبب مقنع يا دكتور أعمل لك  
إيه تاني؟!!

شريف: لا ولا حاجة، ادخلي في الجهاز اللي  
هناك ده واقفلي على نفسك كويس من جوّه..  
تمام! في حاجة عايزة تقوليها لحد أو تسيبي  
رسالة لحد قبل ما تموت؟!!

سارة: آه عمر جوزي.

شريف: عايزة تقويله إيه؟!!

سارة: عايزة أقول له إنك أنت السبب في كل اللي  
أنا فيه ده.. أنت السبب.

شريف: ماشي تمام حابه تموتي بايه؟!!

سارة: مش حابه أي حاجة ممكن تموت الجنين،  
فممكن أموت بإنني أقطع شرابين إيدي.

شريف: طب تمام هنقطع شرابينك علشان تموتي  
أنتِ والجنين ما يموتش.

سارة: تمام يا دكتور.

شريف: لا تمام أنت.. أنت عارفة لو أنت كُنتِ ولد أنا كُنتِ هقول إن اللي اصطفا اللي شاربها دي حلوة، لكن المشكلة إن دي دماغك الطبيعية، اذهبي إلى الجحيم يا سارة!

شريف: أنا عايز أعرف إيه ذنبه عمر في الحوار ده؟! واحدة جايه تنتحر علشان مش عايزة تبقى أم، مش عايزة تفقد أنوثتها ولا جمالها، أو مال اتجوزت ليه من الأول، ولا أي حاجة نلبسها في الرجالة؟!

خالد: لا حول ولا قوة إلا بالله، أنت بتكلم نفسك يا دكتور؟!

شريف: قربت أتجنن يا خالد، المرضى هيجنوني معاهم، كام حالة برّه يا خالد؟!

خالد. خمس حالات يا دكتور.

شريف: طب لو فيهم أي بنت أو مدام قول لها  
تيجي بكره علشان مش هقدر أتكلم معاهم  
النهاردة.

خالد: لا يا دكتور الحمد لله الخمسة كلهم رجالة.

شريف: يبقى استعاننا على الشقا بالله، دَخَل  
الحالة اللي عليها الدور!

خالد: ماشي يا دكتور.. اتفضّل يا أستاذ عاصم.

عاصم

شريف: اتفضّل يا أستاذ عاصم منور العيادة.

عاصم: ده نورك يا دكتور.

شريف: في إيه؟! لما شخصية وسيمة زي  
حضرتك تنتحر أو مال احنا نروح فين؟!!

عاصم: ده بس من ذوقك يا دكتور.

شريف: اتفضّل قولّي إيه مشكلتك اللي أنت عايز  
تنتحر علشانها!!

عاصم: عايز انتحر يا دكتور علشان اخترت  
الشريك الغلط في الحياة.

شريف: بس ده موضوع تافه يا أستاذ عاصم  
ميستا هلش تنتحر علشانه، في حلول كتير غير  
الانتحار ممكن نوصلها.

عاصم: حاولت في كل الحلول يا دكتور.

شريف: طَب احكي لي أنت عملت إيه وإيه الحلول  
اللي حاولت فيها؟!!

عاصم: بص يا دكتور أنا كنت شاب عادي مش  
جميل أوي ولا وحش، يعني شاب زي كل  
الشباب، كنت بحلم أتخرِّج من الجامعة واشتغل  
واتجوز زي كل الشباب، فيها حاجة دي يا  
دكتور؟!!

شريف: لا مفيهاش حاجة، كل الشباب نفسها  
تعمل كده، إيه المشكلة في ده؟!!

عاصم: المشكلة في اللي بعد كده، أنا كُنت شاب  
مع مجموعة من الشباب، وأنت عارف الشباب  
وهزارهم وقعدتهم، واحنا كُنَّا مجموعة حلوة أوي  
مع بعض من أول ابتدائي لحد ما اتفرقنا في  
الكليات لكن متفرقناش على القهوة أبدًا، وفي يوم  
من الأيام القهوة اللي احنا كنا بنقعد عليها اتقلت  
ودي المشكلة.

شريف: شايف الباب اللي هناك ده..

عاصم: أيوة.

شريف: روح سأل عليه من جوّه ومن برّه  
ومشوفش وشك تاني!

عاصم: استنى يا دكتور المهم جاي لسه.

شريف: هو في مهم تاني غير القهوة الي اتقفلت،  
يا فندم أنت جاي لدكتور مش موظف في الحي  
علشان يرجعك القهوة تاني.

عاصم: طب ممكن تسمعي دقيقة واحدة، هو أي  
نعم إن القهوة تتقفل دي كانت أساس المشكلة..

شريف: يعني المشكلة مش في القهوة اللي أنتم  
كنتوا بتقعدوا عليها؟!

عاصم: لا يا دكتور المشكلة جايه أهي.

شريف: اتفضل!

عاصم: بعد القهوة اتفرقنا ومابقيناش نشوف بعض، وبحكم شغلي كنت بتقابل كل يوم مع بنت كانت مرتبطة بشاب من الشلة، وكان كنا عارفين بوضعهم وهو كان شاب جميل ومؤدب، لكن كانت الظروف بتاعته صعبة، كان دايماً عايش في حكايات وأوهام إنه بكره هيكون حاجة حلوة وبكره هيكون وهيكون كان بيتكلم على حاجات استحالة تحصل غير في الأحلام، وهو كانت أحلامه كبيرة جداً واحنا كنا ساعات كثير بنتريق عليها ونقولوا له كلام كثير، لكن هو كان دايماً بيقول لنا إنكم في يوم هتندموا على كلامكم ده.. المهم يا دكتور أنا بحكم شغلي كنت بتقابل مع البنت دي كل يوم وأعجبت بيها وبشخصيتها وحاجات تانية كثير.

شريف: طب وصاحبك!؟

عاصم: ما هي دي كانت المشكلة.. صاحبي.

شريف: مَكنتش قادر تبيعه؟!!



عاصم: لا المشكلة إنني مَكنتش قادر أخليها  
تكرهه علشان هما للأسف كانوا بيحبوا بعض،  
لكن مع الاهتمام الزايد مني والكلمة الحلوة قدرت  
أكسب لطفها مع الوقت وبقينا نفطر مع بعض في  
الشغل واستغلّيت إن صاحبي مشغول ومش  
موجود في حياتها الفترة دي واهتمت بيها أكثر  
وأكثر، وزى ما أنت عارف البنات بتحب اللي  
بيهتم بيها.. وفي يوم عزمتهما على الأكل بعد  
الشغل وبعد الأكل عزمتهما على السينما وكان يوم  
جميل جدًّا بالنسبة لي وبالنسبة لها.. وفي آخر  
اليوم قولتلها أنا مش عايز أضغط عليك بس أنا  
بجد بحبك ونفسي أكمل حياتي معاك، أنا كُنت  
بقول الكلام ده وأنا من جوايا عارف إن ده غلط  
ومينفعش أقوله، لكن القلب لما يحب العقل بيقف،  
وزى ما توقعت سابتنى ومشيت من غير ما ترد  
عليا.

شريف: ده اللي كان المفروض يحصل وده  
طبيعي لكن عايزك توضحلي أكثر أنت ليه كُنت

حاسس من جواك إن اللي أنت بتعمله غلط، أنت  
حببت وعايز تتجوز إيه الغلط في كده؟!!

عاصم: أتجوز.. آه يا دكتور لكن مكنش نفسي  
أجرح حد أو أخذ حاجة مش بتاعتي، مانا إنسان  
بردو يا دكتور وبحس.

شريف: طَب أنت حسيت بشعور صاحبك اللي  
ممکن ينتحر بسبب الحركة دي؟!!

عاصم: في وقتها محسّيتش طبعًا، لكن بعد كده  
حسيت.

شريف: تمام كَمَل!

عاصم: تاني يوم مَجِتَش الشغل فكان المفروض  
أتصل واطمن عليها واعرف هي مَجِتَش الشغل  
ليه، لكن أنا متصّلتش بيها واتصلت باباها  
وأخذت منه ميعاد في نفس اليوم علشان أروح  
أتقدملها، وطبعًا زي ما أنت عارف قعدت مع  
باباها وهي كانت برّه لسه مَجِتَش، اتكلمت مع

باباها وقلت له بالحرف: بص يا عمي أنا موظف مع بنتك في نفس الشغل، وكمان معايا شقة تملكك تلت أوض وصالة ومطبخ وحمام وبتطل على الطريق الرئيسي، وكمان معايا عربية والحمد لله معايا رصيد محترم في البنك، يعني مش هتلاقي عريس لبنتك زيي..

وبصراحة أبوها كان موافق بعد الكلام اللي سمعته، والمهم جت العروسة واتفجأت بيأ أنا وأهلي ودخلت على أوضتها على طول.. فباباها دخل الأوضة وبعد ربع ساعة قدر يطلعها من الأوضة وسلمت عليا وعلى أهلي طبعًا، واستأذنت إنها لازم تنزل ضروري علشان كانت في واحدة صاحبتها تعبانة أوي ومحجوزة في المستشفى وكانت لازم تزورها واتلككت بإن زيارتنا كانت مفاجأة وهي مكنتش عارفة وخرجت طبعًا، لكن أنا كنت عارف إنها ولا في واحدة صاحبتها تعبانة ولا في المستشفى ولا حاجة زي دي، كانت رايحة للشخص الثاني..

ومكنتش عارف إني جايب البرود ده كله منين..  
إني اعرف إن البنيت اللي أنا جاي اتقدم لها بتحب  
واحد تاني وسببتي في اليوم اللي جيت اتقدم لها  
فيه وراحت للشخص اللي هي بتحبه، ومكمل في  
الموضوع عادي.. المهم أبوها عمل معايا  
الواجب وقالنا هنشوف رد البنيت وهنرد عليكم  
والرد أنا كنت عارفه إني مرفوض، لكن اللي  
حصل عكس كده..

شريف: وافقوا؟

عاصم: آه.

شريف: طَب وصاحبك اللي راحتله!؟

عاصم: صاحبي يا دكتور ماشي ورا الأوهام  
وفقير، وأكد لما راحتله قالها إنه مَعندوش فلوس  
علشان يتقدم لها دلوقتي وظروفه صعبة.

شريف: عمر ما كانت الظروف الصعبة أو  
الفقر عائق في موضوع الجواز.

عاصم: دكتور أنت عايش من أيام الأفلام  
الأبيض والأسود صح؟!

شريف: ليه؟!

عاصم: علشان الكلام ده مكنش بيحصل غير في  
الأفلام دي يا دكتور، احنا خلاص اللي معاه  
فلوس بس هو اللي بيتجوز لكن اللي بيحب ده  
ومفلس اعرف إنه عمره ما هيوصل لحاجة  
وهيفضل يحب لحد ما يبجي حد غني زي كده  
وياخدها منه.. المهم وافقوا وجبت ذهب وبكده  
أصحابي كلهم اتصدموا من الموقف ده، وكُنت  
فاكر إنهم مش هيكلموني تاني علشان كانوا  
عارفين ومتأكدين اللي أنا عملته ده كان غلط..  
المهم في آخر اليوم لقيت صاحبي كلهم جايبين بما  
فيهم صاحبي اللي كان أخذت البنت منه، فلبعض  
دقايق فكرت إنهم جايبين يضربوني على اللي أنا  
عملته، لكن المفاجأة إنهم ولا كأن في حاجة أنا  
عملتها، ده بالعكس احتفلوا بيَّازي أي شخص  
بيحتفلوا بيه لما يخطب.. وقضينا يوم حلو وأنا

بصراحة كنت مكسور و مش قادر ارفع عيني  
في عين صاحبي اللي أنا أخذت البنت منه، لكن  
هو كان جدع وراح جايب لنا حاجة ساقعة  
ولب وفول وحاجات تانية كتير أوي، تيجي كده  
قد نص مرتب الشهر اللي كان بيقبضه ومكنتش  
عارف جايب الفلوس دي كلها منين.. المهم هو  
عزمتنا ورفض يقاسم العزومة مع أي حد وشال  
العزومة كلها لوحده.. المهم قضينا اليوم وروّحت  
وأيام تشيلنا وأيام تحطنا اتجوزنا وطبعا صاحبي  
كلهم حضروا بما فيهم نفس الشخص، بس  
الغريب إنني في الفرح مَكنش زعلان ده كان  
بيرقص عادي، وده حتى آه..

شريف: آه إيه بقى؟! أنا مستني أسمع هو عمل  
إيه بقالي ساعة ونص منتظر اللحظة دي، عمل  
إيه بقى!؟

عاصم: المهم بعد كده..

شريف: بعد كده إيه الراجل عمل معاك إيه!

عاصم: بكره هتبقى عريس يا دكتور و هتعرف .

شريف: من غير ما ابقى عريس عارف كمل ..

عاصم: المهم اتجوزنا وقضينا شهر العسل كله  
برّه مصر ورجعنا مصر عادي وكنا عايشين  
عادي، لكن للأسف مقدّرتش كل اللي أنا عملته  
علشانها واللي قدمته من تنازلات لكن كانت لسه  
بتحب نفس الشخص.

شريف: ده طبيعي إنها تحب نفس الشخص، بس  
أنا عايز أعرف إيه التنازلات اللي أنت  
قدمتها!

عاصم: إني أحب واحدة بتحب واحد تاني  
واستحملها وأحاول معاهها واهتم بيها واخرجها  
ونفسح مع بعض و ..

شريف: مَتكلمش علشان مش هتلاقي حاجة  
تقولها علشان دي ما اسمهاش تنازلات ولا  
عمرها هتكون تنازلات، ودي على فكرة أنت في

الجوازة دي متنزلش فيها ولا حاجة، عارف اللي  
أنت عملته ده اسمه إيه؟!!

عاصم: اسمه إيه يا دكتور؟!!

شريف: اسمه ندالة وعدم تربية.

عاصم: احترم نفسك يا دكتور.. إيه الكلام اللي  
أنت بتقوله ده؟!!

شريف: الكلام اللي أنا بقوله هو الصح، أنت  
متربيتش كويس علشان حاجتين.. الحاجة  
الأولانية علشان خدت حاجة مش بتاعتك..  
والحاجة الثانية إنك بصيت على حاجة في إيد  
غيرك وده إن دل على حاجة يدل إنك أنت خارج  
من بيئة مش كويسة، ولا عمرك هتكون كويس،  
كمل يا عاصم وبعد إنك وطّي صوتك وأنت  
بتتكلم!

عاصم: ماشي يا دكتور هوطّي الصوت  
واستحملك.



شريف: شكرًا ليكَ كَمَل!

عاصم: مَفيش.. بعد خمس سنين صاحبي ده بقى  
عنده شركة سياحة كبيرة وبقى عنده فلوس  
كثير..

شريف: وبعدين صاحبك اتجوز؟!

عاصم: لا هو كان مهتم بشغله بس لحد ما  
اشترى الشركة اللي أنا بشتغل فيها، وأنا بقيت  
بشتغل أنا ومراتي عنده.

شريف: الحمد لله، شكرًا ليكَ يارب، عارف يا  
عاصم ربنا رحيم أوي وعمره ما يبببب دعوة  
مظلوم أبدًا.. عارف لو أنت كُنت سيبتله البنات هو  
مَكنش هيوصل للي هو وصله ده، بس هو أكيد  
صلى لربنا وربنا بيسمع للمظلوم أوي.. وبدل ما  
هو ينتحر بسبب اللي أنت عملته فيه الموضوع  
انقلب وأنت اللي جاي تنتحر.

عاصم: كلامك صح يا دكتور أنا مَكنتش عايز  
أنتحر.

شريف: وهو حد عاقل يروح ياخذ واحدة مش  
بتحبه وعايزه مينتحرش، طبعًا كنت هتنتحر لكن  
إني هو مينتحرش ويوصل للي هو فيه ده يبقى  
هو شاب كويس وأحسن منك مليون مرة، كمّل يا  
عاصم عمل فيك إيه تاني؟!!

عاصم: لا هو معملش فيّا حاجة، دي مراتي أول  
لما بقت تشتغل عنده قلبت عليا وفضلت تقول لي  
أنا بكرهك، أنت ازاي غسلت مخي أنت استحالة  
تكون إنسان أنا عايزة اطلق!

شريف: وقّف عند النقطة دي علشان مهمة، هي  
طلبت الطلاق قبل كده؟!!

عاصم: لا دي أول مرة.

شريف: في بينكم أولاد؟!!

عاصم: للأسف لا يا دكتور.

شريف: أنتم بقالكم كام سنة متجوزين؟!

عاصم: ٨ سنين.

شريف: طب وال ٨ سنين دول أنتم مجبتوش  
فيهم عيال ليه، المشكلة عندك ولا عندها؟!

عاصم: ولا عندي ولا عندها، المشكلة إنها كل  
شوية كانت تقولي إنها مش عايزة ولاد دلوقتي  
مش عايزنا نكبر بسرعة.

شريف: أه آه.. بص يا عاصم أنت متكلمش  
كلامك، أنا اللي هكلمهالك، الموضوع مراتك  
محبتكش ولا عمرها ما هتحبك، مراتك كانت  
واخداك كبري يعني لو كان العشق القديم فشل  
كانت تبقى كسبت واتجوزت ومربطتش نفسها  
بواحد عايش في الأوهام، لكن لو العشق القديم  
بقي حاجة كويسة كانت هترميك وتروح لحبيبها  
الأولاني، أنت ليه عملت في نفسك كده يا

عاصم؟! أنت ممكن كُنت تعيش عيشة محترمة  
جداً مع واحدة تحبك وتحبها وتخلفك عيال  
وعيالكم يكبروا وعيشتكم تترتاح وتبقى سعيدة،  
لكن للأسف أنت اخترت إنك تكون في الحياة دي  
ككومبارس مش بطل، فما ترجعش تقول أنا بطل  
أنت كومبارس.. وكومبارس فاشل كمان، ادخل  
الجهاز واقفل على نفسك!

عاصم: بس أنا عايز أقول حاجة..

شريف: وأنا مش عايز أسمعك.. يا خالد!

خالد: أيوة يا دكتور.

شريف: دخّل عاصم الجهاز!

عاصم: أنا عايز أقول حاجة يا دكتور..

شريف: وأنا زي ما قولتلك مش عايز أسمعك..

دخّله يا خالد!

عاصم: بالراحة يا خالد أنت شايل ابن أختك!

شريف: ارميه في الجهاز واقفل عليه ياخالد!

خالد: تمام يا دكتور.

شريف: عارف يا عاصم أنا المفروض كنت أسألك أنت عايز تنتحر بإيه، لكن للأسف الأوبشن ده مش متوفر ليك دلوقتي، أنت هتموت محروق زي ما حرقت قلب صاحبك واشتريت حبيبته بالفلوس، سلام يا أندل شخصية شوفتها في حياتي.. يا خالد!

خالد: نعم يا دكتور.

شريف: دَخَل الحالة اللي بعدها!

خالد: تمام يا دكتور..



خالد: اتفضل يا باشمهندس!

طه: المهندس طه رئيس شركات طه للمقاولات.

شريف: غني عن التعريف يا هندسة، اتفضل استريح.

طه: شكرًا.

شريف: اعذرني في السؤال يا هندسة، أنت جاي هنا ليه لو أنت عندك أي مشكلة ممكن استاذنك تيجي بكره علشان النهاردة أنا قافل موضوع الكشف وبجرب في النظرية الجديدة.

طه: وأنا جاي علشان النظرية الجديدة.

شريف: بس للأسف أنا مش هبيع النظرية بتاعتي لو حضرتك جاي علشان تشتريها فهي مش للبيع، ولو حضرتك جاي علشان تمولها أو تدعمها فأنا رافض برده النقطة دي، شرفتنا يا هندسة.

طه: أنا مش جاي علشان أتبرع أو أشتري حاجة، أنا جاي علشان انتحر.

شريف: يا خالد كوبايتين ليمون بسرعة وهات دفتر شيكات من المكتبة بسرعة يا خالد!

طه: شيكات ليه يا دكتور.. هو أنت مش قولت إنك مش هتبيع ولا هتقبل تبرعات؟!!

شريف: أنت صدقت ده كلام أفلام يا هندسة، المهم هتكتب لنا كام مليون قبل ما تنتحر.

طه: ريح نفسك مَفِيش.

شريف: يعني إيه مَفِيش؟!!

طه: يعني مَفِيش ولا جنيه.

شريف: أنت كنت فاكر إن أنا هاخذ الفلوس دي لنفسى.. لا طبعًا، أنا كنت هتبرع بيها لواحدة بنت حلال نفسها تتجوز بقى لها سنتين ومش عارفة..



لا يا هندسة مش أنا الشخص الي في بالك، أنا  
استحالة هاخذ فلوس لنفسي.

طه: حتى لو كنت هتاخذ الفلوس لنفسك أنا فلست  
معنديش ولا جنيه حتى علشان أكل بيه.

شريف: وأنا اللي كنت فاكر هكمل الجوازة، كمل  
يا هندسة.. إيه اللي حصل معاك؟!!

طه: خسرت كل فلوسي يا دكتور واللي كانت  
أيدي بتمدله علشان تديه دلوقتي بتتمد له علشان  
تاخذ منه.

شريف: مش مهم الفلوس الفلوس بتروح وتيجي  
يا هندسة المهم الصحة.

طه: وأنا جاي النهاردة علشان انتحر، يعني ولا  
فلوس ولا صحة.

شريف: طب إيه اللي حصل معاك يا هندسة  
مممكن توضح لي؟!!

طه: أنا دخلت مشروع من اللي اسمهم مشروع العمر أو ضربة العمر، ودفعت كل فلوسي في المشروع وأخذت قرض كمان علشان أدمع المشروع.

شريف: وبعدين!؟!

طه: المشروع اشتغل كويس وبقت الدنيا شغالة تمام والطلب ابتدا يزيد والحياة كانت حلوة.

شريف: طب وبعدين!؟!

طه: الدنيا اتقفلت وربنا ما يوريك الدنيا لما تنقفل على حد.

شريف: إيه اللي حصل معاك!؟!

طه: الدولار رفع فالبضاعة غليت عند كل الناس والتجار اللي كانت عندها بضاعة قديمة، اضطرت ترفع علشان البضاعة الجديدة اللي هتجيبها.

شريف: تمام دي حاجة طبيعية خالص، الأسعار بترفع وتنزل ده الطبيعي.

طه: يا دكتور الأسعار لما ترفع عمرها ما بتنزل علشان التاجر اللي بيبيع النهاردة الحاجة بجنيه بكره لو رفعت بقت بجنيه ونص، وبعد كده رجعت تاني بجنيه هو هيفضل يبيعه برونه بجنيه ونص، المشكلة فينا احنا مش في الأسعار.

شريف: امم كملّ وبعدين!

طه: وبعدين رفضت إن ارفع الأسعار على البضاعة اللي عندي في المخازن وفضلت أبيع بنفس السعر القديم.

شريف: طب أنت عملت ليه كده؟! دي فرصة وجاتلك لحد عندك وأول حاجة قالوها في التجارة إن التجارة مكسب وبعد كده خسارة، كنت رفعت السعر عادي زيك زي كل التجار.

طه: وفين الضمير يا دكتور؟! الحاجة تنزل  
بالسعر القديم يبقى تتباع بالسعر القديم.

شريف: طب ما ده هيضرب السوق عندي بقي  
التجار علشان هم بينزلوا بسعر أعلى، فلانم  
كنت تراعي التجار برده.

طه: أراعيهم! مش لما هما كانوا راعوا ربنا فيا  
وفي أكل عيشهم.

شريف: ليه همّا عملوا معاك إيه؟!!

طه: ولا حاجة.. حرقوا المخازن بس ولبسوني  
قضية مخدرات واتحبست سنة وخرجت لقيت  
بيتي وعربيتي حاجز عليهم البنك وصاحب  
المخزن عايز فلوس الإيجار بتاعه السنة اللي  
فاتت، وعايز كمان فلوس الخراب اللي حصل  
في المخزن وفضلت واقف قدام المخزن  
مستغرب كل اللي بفكر فيه عايز رغيف عيش  
وأي حاجة عليها علشان كانت بموت من الجوع.

شريف: وعملت إيه؟!!

طه: أنا لسه خارج من السجن النهاردة.

شريف: يعني أنت لحد دلوقتي جعان؟!!

طه: للأسف.

شريف: يا خالد بسرعة انزل هات أحسن أكل  
للبيشمهندس بسرعة!

طه: متجيبش حاجة أنا عايز أموت جعان علشان  
لما أقابل ربنا أقوله إني مُت جعان.

شريف: طب ليه تموت ما أنت ممكن تعيش  
وترجع تبني نفسك تاني!

طه: أبني نفسي مع مين؟!!

شريف: مع الناس والمجتمع.

طه: الناس والمجتمع..! أه مش هما دول اللي  
موتوني يا دكتور.. يلاً خلينا نخلص!

شريف: بس أنت عندك كلام عايز تقوله لسه.

طه: مش هيفيد بحاجة.

شريف: بس أنا عايز أسمعہ.. مش كده برده يا خالد؟!!

خالد: صح يا دكتور.

شريف: صح إيه أنت لسه واقف لحد دلوقتي..  
اخرج وخذ الباب في إيدك!

خالد: تمام يا دكتور.

طه: مَبقاش يفيد الكلام يلاً يا دكتور.

شريف: تمام يلاً يا هندسة، أنت هتدخل الجهاز  
اللي هناك ده وهتقل على نفسك من جوه لحد ما  
أجيك.

طه: تمام.

شريف: أيوة كده تمام حابب تقول حاجة لحد قبل  
ما تموت؟!!

طه: أقول حسبي الله ونعم الوكيل.. حسبي الله  
ونعم الوكيل.

شريف: تمام حابب توصي بحاجة قبل ما  
تموت؟!!

طه: أيوة يا دكتور الساعة اللي أنا لسه لابسها  
دي فيها أربع فصوص ألماظ والعقرب ذهب  
عيار ٢٤ خدها وبيعها واتبرع بفلوسها لأي  
مستشفى بتعالج الكلاب.

شريف: الكلاب ولا البني آدم؟!!

طه: مستشفى الكلاب يا دكتور يا ريتني كنت  
عِشت مع الكلاب ولا عِشت مع بني آدم، عمرك  
شفت كلب ضرب كلب لحد ما مات.. طاب  
عمرك شوفت كلب ضرب كلب قدام ولده.. ولا  
عمرك شوفت كلب يبص في لقمة كلب ثاني؟!!

صحيح هم بيتخانقوا على الأكل لكن عمر ما  
كلب موّت كلب تاني علشان الأكل.. لكن الإنسان  
ممكن يموت الإنسان، مش عشان الأكل بس ده  
علشان شوية ورق ملهوش قيمة، احنا اللي ادينا  
القيمة.. الفلوس يا دكتور عبارة عن ورق  
ملهوش أي قيمة، أنت اللي بتديلو القيمة، يعني  
لو بصيت عليها تلاقيها حثة ورق حقيرة عليها  
شوية حبر رخاص، يلاً يا دكتور يا ريت كان  
الكلام هينفع!

شريف: تحب تموت بايه؟!

طه: نفسي أموت وأنا نايم على سريري، دائماً  
كنت بطلبها من ربنا إني هموت وأنا نايم على  
سريري.

شريف: أنا ممكن أموتك وأنت نايم، لكن للأسف  
مينفعلش أجيبلك السرير ده دلوقتي، لأنه في عهدة  
البنك، سلام يا هندسة.. يا خالد دخل اللي بعده!



خالد: تمام يا دكتور.. اتفضل يا مينا!

هينأ

شريف: اتفضل يا أستاذ مينا.. إيه مشكلتك؟!!

مينا: ولا حاجة.

شريف: طب تمام اللي بعده يا خالد!

خالد: اتفضل يا أستاذ أحمد!

مينا: طب وأنا!

شريف: أنت إيه..! ما أنت لسه قايل إنك معندكش مشكلة.. يلاً شرفتنا يا مينا.

مينا: لا يا دكتور أنا عندي مشكلة.

شريف: طب ليه من الأول، بص يا مينا أنا تعبان من كُتر الحالات اللي جتني النهاردة، فأنت هتقولي مشكلتك على طول وتريح نفسك وتريحني أنا كمان.

مينا: طب يا دكتور.

شريف: فهمتك.. خذ الباب في إيدك يا خالد  
اتفضل احكي!

مينا: أنا عندي مشكلة مع أهلي يا دكتور.

شريف: ما ده طبيعي يا مينا أنت عندك كام  
سنة؟!

مينا: ٢٤ سنة.

شريف: العمر كله ليك.. ها إيه نوع المشكلة اللي  
معاك؟!

مينا: أهلي عايزين يجوزوني يا دكتور.

شريف: طب وفيها إيه؟! ما كل الشباب في السن  
ده لازم تتجوز، أنت مش عايز تتجوز ليه..  
عندك مشاكل عضوية تمنعك من الجواز؟!

مينا: لا أنا تمام يا دكتور.

شريف: عندك شغل؟!

مينا: آه الحمد لله يا دكتور، أنا موظف.

شريف: حكومي ولا خاص؟!

مينا: حكومي.

شريف: تمام جداً.. عندك شقة؟!

مينا: آه يا دكتور.

شريف: تملك ولا إيجار؟!

مينا: تملك يا دكتور.

شريف: عندك عربية أو رصيد في البنك؟!

مينا: عندي رصيد في البنك لكن مَعنديش عربية.

شريف: رصيدك في البنك حلو ولا قليل؟!

مينا: لا حلو يا دكتور.

شريف: طب إيه..! أنت عندك كل حاجة، رصيد  
في البنك شغل حكومي شقة تملك، مَفِيش حاجة  
ناقصاك ومَفِيش حاجة تمنعك من الجواز.

مينا: لا في.

شريف: في إيه؟!!

مينا: المسؤولية.

شريف: يعني إيه المسؤولية يا مينا؟!!

مينا: يعني أكون مسؤول عن بيت و عيال؟!!

شريف: تمام ودي حاجة مش صعبة على فكرة.

مينا: هي فعلاً حاجة مش صعبة، دي مستحيلة.

شريف: مستحيلة ليه، أنت مش هتشيل المسؤولية  
لوحدهك، في حد تاني هيكون شايل المسؤولية  
معاك وبيسندك وبيدعمك وبيشاركك في الحياة

بكل ظروفها ومتاعبها، لازم تتجوز يا مينا اسمع  
كلام أهلك!

مينا: لا.

شريف: لا ليه ده الجواز حلو أوي يا مينا!

مينا: أنت متجوز يا دكتور؟!

شريف: لا بس بسمع.

مينا: متسمعش تاني.. الجواز مسؤولية وهم  
وتعب ونكد وأنت فين وجاي منين وكنت مع مين  
ورايح فين وتحقيقات ملهاش أول من آخر.

شريف: كل الكلام اللي أنت بتقوله ده صح بس  
الكلام ده كله هتتساه أول لما ترجع بيتك وتلاقي  
في حد مستنيك ونفسه يتكلم معاك، حد أنت كنت  
بتحب تقعد معاه تلاقيها مهتمة بيك ومجهزلك  
الأكل وبتتشكر ضغوط اليوم وتخفف عليك  
ضغوط الحياة.. ثانيًا التحقيقات اللي أنت بتقول

عليها دي يا مينا اسمها اهتمام، في حد بيهتم بيك  
فبيسأل عليك أنت فين وبتعمل إيه، حد مش قادر  
يستغنى عنك ولو ثواني، فبيسأل عليك كل ثواني  
أنت اللي مش فاهم الجواز يا مينا الجواز حلو..

مينا: ده رأيك؟!!

شريف: آه طبعًا.

مينا: طب خايبه لنفسك، بكره هتتجوز وهتعرف  
وهتدور على حد علشان يساعدك في الانتحار.

شريف: مينا أنت جاي هنا علشان تموت.. أنا  
هموتك، بس عندي ليك كام سؤال ولازم  
تجاوبني عليهم وبكل صراحة، علشان أنت كده  
كده هتموت فبلاش تكذب، مينا.. أنت عايش مع  
أسره مش متفهمة وده سبب مشكلة في حياتك  
صح..؟! وطول ما أنت ساكت يبقى صح، أنت  
عندك مشكلة في الجواز عمومًا ولا في شخص  
معين أهلك فارضينه عليك؟!!



مينا: مَفِيش حد مفروض عليا، أنا مشكلاتي في الجواز عمومًا.

شريف: حبيت قبل كده؟!!

مينا: لا.

شريف: طب إيَّا كان.. في أي نظرات إعجاب!!

مينا: لا.

شريف: يعني عندك عقدة نفسية من الجواز وعندك مشكلة في الكسوف، وفكرة الرفض الدائم، مينا أنت ليه لحد دلوقتي مَدخلتشي في علاقة مع أي بنت!!

مينا: مَلقيتش الإنسان المناسبة.

شريف: تقصد خايف تدخل في علاقة، يمكن تترفض وشعور الرفض ده شعور طبيعي في جسم الإنسان، كلنا بنخاف إننا نترفض.. بس أنا ممكن أعالجك من كل المشاكل اللي عندك

وأخليك تعيش حياة طبيعية.. لكن أنا لو قولتلك  
كده هترفض وتقوللي أنا عايز انتحر.. وحتى لو  
وافقت أنا بردو هخليك تنتحر.

مينا. ليه

شريف: من غير ليه.. أنت جاي هنا مش علشان  
علاج، أنت جاي هنا علشان تنتحر وأنا هخليك  
تنتحر.

مينا: طب ما أنا ممكن أغير قرارى ومَنتحِرش  
واتعالج.

شريف: الطلب ده مرفوض.. يا خالد فضّي  
الجهاز!

خالد: الجهاز فاضي يا دكتور.

شريف: خد مينا وحطه في الجهاز، سواء كان  
بالذوق أو بالعافية.

مينا: أنا مش عايز أموت، أنت قولتلي إني ممكن  
أتعالج، هتموتني ليه؟!!

شريف: خالد ارميه في الجهاز!

مينا: سييني.. الحقوني.. آه ه ه.. حد يلحقني  
هيموتوني.. سييوني علشان خاطري أنا آسف يا  
دكتور.. أنا مش هعمل كده تاني أبوس على إيدك  
سييني أروّح!

شريف: اقل عليه الجهاز واخرج برّه يا خالد!

خالد: تمام يا دكتور.

شريف: بص يا مينا.. أنت هنا هتموت يعني  
هتموت، فانت حابب تموت ازاي؟!!

مينا: مش عايز أموت.

شريف: يبقى مَكنتش جيت هنا من الأول، عايز  
تقول حاجة لحد أو تسيب حاجة لحد قبل ما تموت  
يا مينا؟!!

مينا: مش عايز أموت.

شريف: للأسف الطلب خرج ومينفعش يرجع،  
وعلشان أنت حبيبي أنا هموتك بالدبح زي ما  
هدبح فرخة، أنا هدبحك.. سلام يا مينا.

مينا: لا أنا مش عايز أموت.

خالد: عملت كده ليه يا دكتور كنت سييته يعيش!

شريف: أنت هنا من امتي؟!!

خالد: أنا ما خرجتش أساساً.

شريف: طب اخرج ودخل الحالة اللي بعدها!

خالد: لا أنا مش هشتغل معاك أنت مجنون يا  
دكتور، أنا مش عارف أنت بتعمل في الناس دي  
كده ليه؟! الناس دي بشر.. اللي أنت دبحته ده  
زي الفرخة ده بني آدم مش فار تجارب، اللي  
أنت بتعمله ده جريمة وأنا مش هشترك معاك

فيها.. وادي لبسك أنا مش عايز اشتغل معك  
تاني!

شريف: اقعد وخلص الكام حالة اللي قاعدين  
أحسن لك!

خالد: احسنلي؟! أنت بتهددني يا دكتور؟! أنت لو  
فكرت تموتني أنا هموتك، أنا خارج من عيادتك  
وكإني مشوفتش ولا سمعت حاجة، ولا تأذيني  
ولا أذيك، لكن لو دماغك وديتك وفكرت تأذيني  
أنا مش هرحمك يا دكتور.. سلام يا متخلف!

شريف: أنت اللي اخترت فامترجعش تزعل..  
مساء الخير أستاذ أحمد اتفضل أنت اللي عليك  
الدور.. وبعد كده أستاذ فضل.. أنا بعنذر لكم بس  
الممرض عنده ظروف صعبة وكان لازم يمشي  
ومش فاضل غيركم أنتم الاتنين، فياريت نتعاون  
مع بعض.. اتفضل يا أستاذ أحمد!

أحمد

شريف: اتفضل استريح يا أحمد لحد ما أفضي  
لحضرتك الجهاز.. أنت لسه واقف اتفضل يا  
أحمد!

أحمد: ميفعش يا دكتور لازم حضرتك تقعد  
الأول.

شريف: شكرًا لذوقك، عندك كام سنة يا أحمد؟!  
أحمد: ١٨ سنة.

شريف: ١٨ سنة وعايز تنتحر، أنت صابر على  
نفسك كتير أوي كده ليه!

أحمد: أنت بتهزري يا دكتور؟!

شريف: طبعًا شاب زيك كده في أحلى سن عايز  
ينتحر ليه؟! إيه المشكلة اللي شوفتها أو مشكلتك  
اللي تخليك تنتحر في السن ده؟!

أحمد: الثانوية العامة يا دكتور.

شريف: مالها؟!

أحمد: بتسلم عليك يا دكتور.. عايز انتحر يا  
دكتور بسبب الثانوية العامة.

شريف: ليه؟!!

أحمد: الغي موضوع الثانوية العامة ده خالص..  
أنا عايز انتحر عشان حضرتك بارد!

شريف: ما أنت كمان لازم تكون بارد طول ما  
أنت في فترة الثانوية العامة.

أحمد: ليه؟!!

شريف: علشان فترة الثانوية العامة دي بتكون  
أصعب فترة في حياتك، بس ده بيكون من خالك  
أنت بس علشان دي بتكون أصعب فترة في  
حياتك، بس ده من خيالك أنت علشان دي بتكون  
أول حاجة صعبة بتواجهها في حياتك، لكن بعد  
كده هتتعود على كل الصعوبات اللي بتكون في  
حياتك، وكل ما تيجي لك حاجة صعبة لازم  
تفتكر إنك لازم تكون بارد علشان تقدر تعدي



الصدمة، ودي نصيحة هتتعرف قيمتها بعدين،  
ندخل بقى في المهم، أنت جبت كام في الثانوية؟!!

أحمد: ٥٢%.

شريف: حلو.. يدخلوك كلية محترمة، تحب تدخل  
إيه؟!!

أحمد: دكتور كفاية هزار!

شريف: خلاص هدخل في الجد بس أنا كنت  
حابب أهزر معاك، بس علشان أنت كنت متوتر  
جدًّا وأنت داخل، لكن الوضع دلوقتي فك شوية  
وهتقدر تحكيلى وأنت مستريح، احكيلى يا أحمد!

أحمد: بص يا دكتور.. أنا بابا كان عايزني أطلع  
مهندس وماما كانت عايزاني أطلع دكتور، وزى  
ما أنت عارف ده علمي علوم وده علمي رياضة.

شريف: طب تمام وأنت كان نفسك تطلع إيه؟!!

أحمد: لا أنا كان نفسي ولا اطلع مهندس ولا  
دكتور، أنا كان نفسي أطلع مغني راب.

شريف: هي دي إضافة جديده في الثانوية  
العامة؟!!

أحمد: لا يا دكتور دي إضافة جديدة في الحياة،  
بس هي دي الشغلانة الماشية دلوقتي، أنت  
عارف الأغنية الواحدة بتلم كام مليون مشاهدة؟!  
هتكسب منها كام؟!!

شريف: كام؟!!

أحمد: مش أقل من مرتبك ست شهور.

شريف: يعني الموضوع حلو وبيكسب؟!!

أحمد: آه يا دكتور موضوع جميل وفي فلوس.

شريف: طب إيه رأيك لو الناس كلها هتغني راب  
علشان تكسب، إيه اللي هيحصل؟!!

أحمد: مَحدث هيسمع الثاني، بس هنعمل إيه.. ده  
الماشى دلوقتي.. بص يا دكتور أنا أصغر منك،  
لكن عندي خبرة كبيرة في الحياة.

شريف: طب اديني من خبرتك!

أحمد: بص النجاح يا دكتور بيكون من تلت  
طرق..

الطريق الأول هو لعب الكورة.

الطريق الثاني هو غنا الراب.

الطريق الثالث ده للبنات، وهو الرقص، وكل ما  
ترقص أكثر هتتعرف أكثر، وكل ما تتعرف أكثر  
هتتجح أكثر وهتكسب أكثر وأكثر.

شريف: طب وباقي المجالات مش ممكن تنجح  
فيها؟!!

أحمد: مين قال إنك مش هتتجح.. هتتجح بس  
هتعيش شحات طول عمرك.

شريف: طب طول ما أنت فاهم الدنيا كده كويس  
وعارف إنك ازاي تتجح، جاي تنتحر ليه؟!!

أحمد: علشان حاسس بالذنب.

شريف: من إيه؟!!

أحمد: من فلوس أبويا اللي صرفها عليا يا دكتور  
في التعليم ومن طموحهم إني أبقى حاجة وأنا  
خبيت ظنهم، أنت عارف يا دكتور أنا أبويا  
اشتغل شغلانة تانية بعد شغله الأساسي علشان  
يوفرلي فلوس للدروس والكتب علشان أبقى  
حاجة.. ودي الحاجة الوحيدة اللي خلتني أذاكر  
وأتعب لحد ما جبت ال ٥٢%.

شريف: ال ٥٢% ده كده أنت تعبت؟!!

أحمد: كتير أوي يا دكتور، ده أنا كنت بذاكر تلت  
ساعات في اليوم علشان الرقم ده.

شريف: أنت بتهزر؟!!

أحمد: لا أنا بتكلم بجد.

شريف: ماشي وبعد ما كانت بتذاكر تلت ساعات!

أحمد: كنت عايز اطلع دكتور أو مهندس زي ماهما كانوا عايزين.

شريف: عايز تبقى دكتور أو مهندس بتألت ساعات مذاكرة في اليوم يا أحمد!

أحمد: آه يا دكتور كتير التلت ساعات على فكرة، أنا كنت حاسس إنني المفروض كنت أذاكر ساعتين بس.

شريف: ما أنا بقول كده.. تلت ساعات كتير أوي، ده أنت كنت راسم إنك تدخل جراحة قلب على كده بالتلت ساعات دول، طب بقول لك يا أحمد أنا عندي ليك فكرة حلوة..

أحمد: قول يا دكتور!

شريف: إيه رأيك لو رجع بيك الزمن هتعمل إيه؟!!

أحمد: كنت عملت وعملت..

شريف: طب بص.. أنا عندي هنا جهاز بيرجع الزمن اللي فات تحب ترجع بالزمن ولا تنتحر؟!!

أحمد: أرجع بالزمن طبعًا.

شريف: طب روح ادخل جوّه الجهاز ده، ووأنت جوّه فِكر إنك عايز ترجع لحد تاريخ كام..

أحمد: ٢٠١٨/٨/١٨.

شريف: اشمعنا؟!!

أحمد: تاريخ مميز يا دكتور.

شريف: طاب تمام بص يا أحمد.. أنا كدبت عليك، الجهاز ده مش بيرجعك بالزمن الجهاز ده هو اللي بيخليك تنتحر وأنت دلوقتي عندك

فرصه تقول اللي أنت عايزه أو تسبب لحد حاجة  
قبل ما تموت، وكم ان تقدر تختار أنت عايز  
تموت بآيه!

أحمد: نفسي أقولك حرام يا دكتور.. حرام حرام  
حرام.

شريف: هو الحرام يا أحمد.

أحمد: حرام كل أب وكل أم يشيلوا ابنهم حاجة  
هو مش قدها، أنا لما قولت إن الغناء بيكسب أنت  
قولتلي طب لو البلد كلها غنت إيه اللي  
يهحصل؟! قولتلك مَحدث هيسمعك حد طب أنا  
بقول لك دلوقتي لو البلد كلها دخلت طب والبلد  
كلها بقت دكاترة، إيه اللي هيجصل يا دكتور!؟

شريف: إيه؟!!

أحمد: البلد كلها هتموت علشان مَفيش دكتور  
بيكشف عند دكتور كلكم بتفهموا في كل حاجة..  
بص يا دكتور احنا ربنا خلقنا مختلفين ولحد يوم

القيامه البشر هيكونوا كلهم مختلفين ولا ينفع  
نكون كلنا دكاترة ولا كلنا مهندسين، ولا حتى  
كلنا مغنيين لازم كلنا كل واحد فينا يكون في  
مجال مختلف، والنجاح مش إنك تدخل في  
المجال اللي أنت بتحبه، النجاح هو إنك تكون  
الأول في المجال اللي أنت فيه.. أنا كان نفسي  
أطلع محامي يا دكتور وبابا وماما كانوا رافضين  
الفكرة وكانوا عايزين يدخلوني كليات على  
مزاجهم همّا، مش الكلية اللي أنا كنت عايز  
أدخلها، فده اللي خلاني ما أذاكرش علشان كنت  
عارف إنني حقوق بتقبل من ٥٠% بس، فأنا كنت  
بذاكر علشان أجيب ٥٠% بس وأول لما جبت  
٥٠% وهدخل الكلية اللي أنا عايزها أهلي  
رفضوا وقالولي لازم تعيد السنة تاني وتدخل  
طب أو هندسة وأنا ولا عايز ادخل طب ولا  
هندسة وحاولت أقنعهم أكثر من مرّة إن حقوق  
بالنسبالي أهم من طب والهندسة، لكن هما كانوا  
بيقولوا لي هتطلع محامي هنعمل بيك إيه احنا  
عايزين دكتور، شايف الكلمة يعني أنا لازم اطلع



دكتور علشان أرضي ماما أو اطلع مهندس  
علشان أرضي بابا، لكن لو طلعت محامي علشان  
أرضي نفسي ده ممنوع وأنا ولا هعيد السنة ولا  
هكون زي ما هما عايزين، أنا إنسان ربنا خلقتي  
حر وهعيش وأموت وأنا حر ومحدّش هيقدر  
يفرض عليّ حاجة أنا مش عايزها.

شريف: كلامك ممتاز حابب تقول حاجة لأهلك!؟

أحمد: آه حابب أقول لأبويا وأمي خلّي الدكتور  
والمهندس ينفعكم لما الحكومة تيجوا تقبض  
عليكم بعد ما هيلاقوا في الشقة المخدرات، أصل  
أنا قبل ما أجيلك اشتريت مخدرات وخليتهم في  
دولاب بابا، وكم ان قولت لواحد صاحبي يبلغ  
البوليس بعد الساعة ١٢:٠٠ بالليل، علشان  
ميعرفوش يهربوا.

شريف: أنت هتحبس أبوك علشان تعرفه إن  
المحامي ليه لازمة!؟

أحمد: متقلش أنا مظبط كل حاجة.

شريف: ربا يستر.. طب عايز تموت بايه؟!

أحمد: انهيار عصبي.

شريف: حلوة الموتة دي، أول واحد يطلبها مني،  
فعلاً الموت ده أذواق، عايز تقول حاجة تانية يا  
أحمد؟!

أحمد: لا.

شريف: سلام يا أحمد..

# فصل

شريف: يا خالد اللي بعده يا خالد يا خالد..!

فضل: أنت نسيت ولا إيه يا دكتور.. خالد  
مشي..!

شريف: آه صحيح معلى نسيت.. اتفضل يا  
فضل.

فضل: شكرًا يا دكتور.. بس أحمد بيعمل كده ليه  
يا دكتور!؟

شريف: ما تحطش في بالك وبلاش تبص على  
الجهاز علشان متتعيش، مش أنت جاي علشان  
تنتحر.

فضل: آه.

شريف: يبقى خليك في نفسك وبلاش تبص على  
موت حد تاني.

فضل: تمام يا دكتور.

شريف: قولي عايز تموت ليه.. وإيه المشكلة اللي  
عايز تموت علشانها؟!!

فضل: مشكلتي إني وحيد، من ساعة ما أبويا  
وأمي ماتوا وأنا عايش وحيد، ولا حد يبسال عليا  
ولا حد بيفتكرني.

شريف: أبوك وأمك اتوفوا بقالهم كام سنة؟!!

فضل: خمس سنين.

شريف: طاب طول الخمس سنين دول مَحْدَث  
من قرايبك فكر يتصل بيك أو يسال عليك أو  
يزورك؟!!

فضل: ولا حدش فكر يعبرني حتى بمكالمة يا  
دكتور، الناس مَبَقْتَش فاضية، الناس كلها عندها  
شغل ومَحْدَث بقى فاضي يسأل على حد.. بقيت  
بقعد على النت بالساعات منتظر أي حد يتصل  
بيا، ممكن الاتصال ده يكون حاجة تافهة من

وجهة نظر الشخص اللي هيتصل، لكن هتفرق  
معايا كتير أوي يا دكتور.

شريف: طب مَفكرتش إنك أنت اللي تبدأ وتساءل،  
وهما أكيد هيسألوا عليك زي ما أنت سألت  
عليهم!

فضل: عملت كده كتير يا دكتور لحد ما اتعودوا  
إن أنا اللي دايمًا أسأل عليهم، لكن إن أي حد يهتم  
بيالآ، وبقى اتصالي ليهم حق مكتسب عليا.  
شريف: طب مَفكرتش أنت إنك ترتبط أو  
تتجوز؟!

فضل: منين يا دكتور..؟! زي ما أنت شايف  
الحياة صعبة وأنا راجل على قد حالي.

شريف: طاب مالکش أخ أو أخت يسألوا عليك؟!

فضل: لَيَّا يا خال وعم.

شريف: طب واخواتك؟!

فضل: أنا وحيد يا دكتور.

شريف: طب احكي لي أبوك وأمك اتوفوا ازاي؟!  
وبعد ما توفوا إيه اللي حصل؟!!

فضل: أنا هحكلك الموضوع كله في جملتين،  
الجملة الأولى إن أبويا مات من السرطان بعد ما  
بيعنا اللي و رانا واللي قدامنا علشان علاجه،  
والجملة الثانية أمي ماتت من الزعل على أبويا  
بعده بأسبوع.. وسبوني ومس ابوليش ولا ورث  
ولا فلوس علشان كده ما حدش من قرابيبي  
عبرني.

شريف: طب وأنت إيه اللي صبرك طول فترة  
الخمس سنين دول.. متحترش ليه؟!!

فضل: كنت خايف ربنا ومكونتش عايز أموت  
كافر.

شريف: طب ودلوقتي؟!!

فضل: مش مستحمل أعيش، وأنا كده كده لا  
هموت كافر ولا منتحر.

شريف: ليه؟!!

فضل: مش أنت دكتور؟!!

شريف: آه.

فضل: وأنت عندك فكرة انتحار جديدة وعاليز  
تخلي العالم كله ينتحر بيها؟!!

شريف: أيوة.

فضل: وأنا من أول الناس اللي ساهمت معاك  
واتبرعت علشان الفكرة بتاعتك؟!!

شريف: أيوة.

فضل: بيقا ما اسمهاش ميت منتحر يا دكتور،  
تبقى اسمها شخص ضحى بحياته من أجل العلم  
أو متطوع يا دكتور، أو حتى أقل حاجة فار



تجارب، وأكيد ربنا بعد اللي أنا هعمله ده  
هيسامحني علشان مش أنا اللي موّت نفسي، أنا  
موّت نفسي علشان غيري.

شريف: يا عم بات مان أنت موّت نفسك مين  
علشان غيرك؟! أنت هتموت وغيرك برردو  
هيموت، أنا مش جايبك علشان تاخذ فيروس  
ونجرب فيك.. أنت جاي علشان تنتحر وغيرك  
هيجي علشان ينتحر زيك.

فضل: يعني هموت كافر يا دكتور!؟

شريف: انا مش راجل دين علشان أقدر أقول لك  
هتموت كافر ولا لا، بس علمياً أنت هتموت  
منتحر.

فضل: منتحر منتحر مَبَقْتَش فارقة.

شريف: بص أنا المفروض أقعد أنصحك علشان  
مَتنحَرش، لكن أنا مش هنصحك عارف ليه!؟  
علشان حاجتين.. واحد علشان أنت صح..

فضل: طب وانتين؟!!

شريف: علشان نفسي أروّح أنام، تعبت من أول  
اليوم لحد دلوقتي ناس داخلّة وناس خارجه..  
تعبت يا فضل.

فضل: ربنا يقويك يا دكتور باين عليك التعب..  
تحب أوصلك؟!!

شريف: توصلني فين ده أنا اللي هوصلك  
دلوقتي.. يلاً يا فضل شايف الجهاز اللي هناك ده  
طلّع منه أحمد بس بالراحة علشان حرمة الميت  
وادخل أنت مكانه!!

فضل: أنتم السابقون ونحن اللاحقون.. معلىش يا  
أحمد هاخذ مكانك..

شريف: بالراحة على الميت أنت هتتشال زيه  
كمان شوية.

فضل: ماشي يا دكتور بالله عليك.. وأنت  
بتخرجني من الجهاز اضربني في الأرض  
عشان تتأكد إن أنا مُت، ولو مَموتش دخاني  
جهاز تاني بسرعة!

شريف: حاضر.. المهم أنت مش عايز تسيب  
حاجة لحد أو تقول حاجة لحد؟!!

فضل: آه يا دكتور أنا كان نفسي أول لما أموت  
واتدفن يتكتب على القبر بتاعي لو حد كان  
فاضي دقيقة أو رن كان الميت قام ورد.

شريف: طب تمام هنكتبهالك على القبر الكلام  
ده، عايز تقول حاجة تاني؟!!

فضل: لا.

شريف: طب نفسك تموت بإيه؟!!

فضل: نفسي أموت بجسمي زي ما هو ولا  
مكسور ولا متعور.

شريف: تموت متكهرب؟!!

فضل: لا.

شريف: غرقان؟!!

فضل: لا.

شريف: مسموم؟!!

فضل: لا.

شريف: حيرتني معاك.. أومال عايز تموت  
بايه؟!!

فضل: أموت من الاكتئاب.

شريف: أعملها لك ازاي دي؟! أنا ممكن أموتك  
بأزمة قلبية شبيهة للي أنت عايزه.. موافق؟!!

فضل: موافق.

شريف: مع السلامة يا فضل.. أنا هروح أنزل  
أحمد ومينا المخزن لحد ما فضل يخلص، شوف  
حكمة ربنا.. هنزل أحمد ومينا مع بعض..  
عظيمة هي الروح الوطنية، حتى الموت فيه  
الروح الوطنية.. أيوة كده وأهو كمان فضل  
خلص يلا نقفل ونروِّح.. يا ترى ماما عاملة لانا  
إيه على الأكل؟! تبقى جدعة معايا لو عملت  
النهاردة حلة محشي.. يا خرابي..

# المقبوض على شريفه

مديحة: إيه اللي رجعتك بدري من العيادة يا خالد؟!!

خالد: أنا سببت الشغل في العيادة خلاص.

مديحة: يا لهوي يا لهوي.. ليه كده يا أخويا هناكل منين أنا والعيال?!!

خالد: مَحَدِّش بيموت من الجوع يا مديحة، ربنا مش هينسانا.

مديحة: طب قوللي إيه اللي حصل?!!

خالد: الدكتور المجنون اللي أنا شغال عنده الشيطان ورث له الفكرة دي ده ما فيش بني آدم عاقل وماشي مع ربنا يعمل الفكرة دي، وقال إيه نظرية وعمال يموت في الناس، والنهاردة قتل ٢٠ بني آدم.

مديحة: طب وأنت سبيته يموت ال ٢٠ بني آدم وأنت ساعدته?!!

خالد: كنتِ عايزاني أعمل إيه يعني؟!!

مديحة: كنتِ بلغت البوليس يا أخويا.

خالد: أبلغ آه.. علشان يقتلني أنا كمان.

مديحة: ومين قال لك إن هو مش هيقتلك، أنت دلوقتي عارف عنه كل حاجة، في حد تاني كان معاك لما كان بيموت الناس؟!!

خالد: لا كنت أنا وهو وبس.

مديحة: يبقى هيموتك هيموتك، جايه يا ولاد جايه، جوزي هيقتل، أنت تروح دلوقتي للبيه الضابط وتبلغه بكل اللي أنت شوقته علشان يقبضوا عليه قبل ما يقتلك يا أخويا، وييتمنا أنا والعيال.

خالد: متقوليش كدا.. أنا هبقى اروح الصبح وابلغ في المركز.



مديحة: لا يا أخويا أنت لازم تروح دلوقتي قبل  
ما يأجر حد عليك علشان يقتلك.

خالد: نامي يا مديحة والصبح هبقى أبلغ.

مديحة: لا أنت هتروح دلوقتي بدل ما أنا اللي  
أروح مكانك..

خالد: أنتِ اتجننتِ ولا إيه؟! مش هعرف أحكم  
عليك.. نامي نامت عليكِ حيطة!

مديحة: أنا خايفة عليك ليه.. يا رب يقتلك  
ويريحي منك!

خالد: يا رب يا شيخة يقتلني علشان أنا اللي  
استريح منك.. عايزاني أطلع دلوقتي في نص  
الليل.. افرض أجز عليًا واحد وأنا طالع في نص  
الليل، يبقى أنا اديتهم فرصة من ذهب إنه يقتلني،  
لكن أنا لما اطلع الصبح وابلغ حتى لو اتقتلت  
يبقى هتقدروا تعرفوا مين اللي قتلني، نامي يا  
مديحة يا رب ما تقومي!

مديحة: بعد الشر.. إن شاء الله أنت!

\*\*\*\*

شريف: ست الحبايب يا حبيبة.. أنا راجع من الشغل مطحون يعني لحد ما آخذ الدش اطلع ألاقيكِ مجهزالي أكل ملوكي.

الأم: حاضر يا دكتور بس قوللي الأول روحت لخالتك.. طلع عندها إيه؟!!

شريف: طلعت حامل يا ماما.

الأم: يا ولد اتلم.. خالتك هتحمل من سنانها..

شريف: وأنا إيش عرفني ما أنتم عيلة غريبة أعمل لكم إيه؟!!

الأم: يبقى مروحتش عند خالتك!

شريف: أروح أهبب إيه يا ماما.. خالتي أسنانها وجعاها وأنا دكتور نفسي أروح أعملها إيه؟!!

ماما: عالجا زي ما أنت بتعالج نفسك!

شريف: بقالى ١٠ سنين بشرحلك أنا دكتور  
أمراض نفسية، يعني بيجيلي اللي عنده اكتئاب  
اللي عنده انفصام في الشخصية اللي بيكلم نفسه..

الأم: أه يعني دكتور مجانيين!

شريف: أيوة يا ست الحبايب دكتور مجانيين،  
مشيها دكتور مجانيين.. إيه هتجهزيلي الأكل ولا  
اطلع أقبلبك مجنون واكسرلك البيت كله؟!

الأم: لا هجهزلك الأكل يا حبيبي.. غمّض عنيك  
يلا فتح.. أحسن طبق عدس لحبيبي شريف.

شريف: عدس!

الأم: أه ماله العدس.. أنت هتتبطر على النعمة؟!

شريف: لا أنا رايح أكل رز مع الملايكة  
أحسنلي.. كُلي أنتِ العدس ده يا ماما!

الأم: على فكرة طبق العدس ده هيجري وراك  
يوم القيامة، وبالراحة على الباب!

شريف: بقولك يا ماما صحيني بكره الساعة  
٧:٠٠ الصبح، ها الساعة ..٧:٠٠ يعني الساعة  
٧:٠٠ بالدقيقة تصحيني.. لكن تيجيلي الساعة  
٥:٠٠ وتقوليلي قوم يا حبيبي الساعة دلوقتي  
٩:٠٠ ارحمني صحيني الساعة ٧:٠٠ بتوقيت  
القاهرة، مش بتوقيت تل أبيب، تصبحي على  
خير يا ماما.

الأب: اصحى يا شريف الساعة بقت ٦:٠٠.

شريف: صباح الخير يا بابا أو مال ماما فين؟!!

الأب: أمك يا سيدي زعلانة منك علشان ما  
أكلتش العدس، فقالتلي روح صحّيه أنت  
وجهزتلك الفطار كمان.

شريف: أيوة كده الكلام يخلو، روح أنت اسبقني  
على السفارة لحد ما أنا ألبس واغسل وشي  
واسرح شعري واجيلك.

الأب: مستنيك يا حبيبي بس ما تتأخرش!

شريف: حاضر يا بابا.

الأب: يا شريف يا شريف ساعة يا ابني.. يلا بسم  
الله.

شريف: إيه ده؟!!

الأب: العدس بتاع امبارح أمك سخنته مع شوية  
بصل إنما إيه مقولكش.

شريف: أنا رايح العيادة سلام يا بابا.

الأب: طب والفتار مش هتاكل؟!!

شريف: لا لا لا..

الأب: طب خذ الزبالة معاك.

شريف: لا لاه لاه لا لاه لاه.

الأب: الواد ده دماغه اتلست من كتر الحالات  
اللي بيشوفها.

\*\*\*\*

أحمد: احنا فين؟!!

فرح: إيه ده احنا مموتناش ازاي؟!!

عبد الرحمن: لا احنا موتنا بس شكلنا متأخرين،  
شوفلنا أي شيطان كده معدّي نسألّه.

عاصم: يا عم اقعد شيطان إيه.. احنا لسه عايشين  
الدكتور ضحك علينا يا جماعة.

شريف: مين اللي قال كده.. أنتم مش كنتم عايزين  
تموتوا؟!!

الجميع: أيوة.

شريف: وأنا نفذتلكم اللي أنتم عايزينه.

هدير: بس احنا لسه عايشين يا دكتور.

شريف: ما أنا عارف.

ماهر: يعني أنت كنت بتضحك علينا؟!!

شريف: لا أنا اديتلكم فرصة ثانية.

فرغلي: ومين قالك إننا عايزين فرصة ثانية؟!  
احنا عايزين نموت.

شريف: طب أنا هشرحلكم النظرية اللي أنا جبتكم  
علشانها، وبعد كده اللي عايز يموت أنا اللي  
هموتّه بنفسي، والمرة دي بجد مش هزار  
هتسمعوا ولا تموتوا؟!!

طه: أنا مش هسمع ولا فاضي إني هسمع حاجة.

شريف: مش فاضي.. وراك إيه يا هندسة؟! ده  
أنت ميت وأنا بمدلك إيدي علشان أساعدك.

طه: وأنا مش عايز مساعدتك.

شريف: بصوا يا جماعة الجهاز اللي انتوا دخلتوه  
أول مرة مش بيموت، لكن اللي بيدخلوا مرتين  
بيموت اللي استحمل الوجع والتعب بتاع الجهاز  
وعايز يدخل تاني أنا مشغل الجهاز عايزين  
تدخلوا اتفضلوا عايزين تستنوا وتسمعوا اسمعوا  
عايزين تموتوا الجهاز شغال، وأنا بخيّركم  
عايزين إيه؟!!

الجميع ما عدا طه: هنسمعك يا دكتور.

شريف: وأنت يا هندسة؟!!

طه: يعني هي جت عليًا أنا.. أسمعك حتى لو قلت  
إيه.. كلام مش هيبجي حاجة جنب الألم بتاع  
الجهاز ده.

شريف: بصو الجهاز اللي انتوا دخلتوه ده هو  
عبارة عن شاشات ثلاثية الأبعاد، والبتاعة اللي  
كنتم بتخطوها فوق دماغكم ده جهاز مزود بأشعة  
كهربائية مهمتها تحسس المخ بكل الألم المنبعث



من الشاشات، بخلاف إنني في أنبوبة مخدر  
عشان تفقد الوعي والمخدر مع شاشات  
والكهرباء بتعمل غيبوبة مؤقتة بطريقة انسحابية،  
يعني بسحبك بكل حاجة وبفقدك الوعي تدريجياً  
والهدف من ده كله..

خالد: أهو يا حضرت الطابط أهو الدكتور  
المخلول اللي أنا حكيتلك عنه، وهو مينا ده اللي  
أنا قولتلك مكنش عايز يموت وموته، وده طه  
المهندس وعاصم أهو يا حضرت الطابط، وأحمد  
أهو كلهم يا حضرت الطابط ميتين والدكتور  
مجتمع بيهم، يا مينا قول ل حضرت الطابط  
الدكتور موتك ازاي!

شريف: اتفضل يا حضرت الطابط استريح في  
إيه؟!!

الطابط: في إن الممرض بتاعك جه وبلغ إنك  
أنت بتقتل المرضى.

شريف: مين الممرض بتاعي خالد ده مريض  
عندي يا حضرت الطابط مش ممرض.. أنا  
معديش ممرضين هنا.. يا حضرت الطابط.

الطابط: يعني ده مش الممرض بتاعك؟!

شريف: لا يا حضرت الطابط ده مريض عندي  
وأنا بعالجه، عنده مشكله انفصام في الشخصية  
ومشكلة الانفصام في الشخصية دي يا فندم  
الشخص بيشوف وببسمع حاجات هو بس اللي  
بيشوفها.

خالد: لا أنا مش مجنون يا حضرت الطابط، ما  
تقوليله يا هدير ولا قول له يا فضل الدكتور  
موتكم ازاي!

الطابط: احنا متأسفين يا دكتور اقضوا عليه!

شريف: أنا آسف يا حضرت الطابط، بس أنت  
مش هينفع تقبض على خالد علشان ده هيكون  
خطر عليك وعلى العساكر علشان هو هيدخل في

حاله صرع دلوقتي نتيجة الصدمة اللي هو فيها،  
وممكن في حالة الصرع يقتلك ويقتل العساكر  
بالسلاح اللي معاهم وهتبقى كارثة كبيرة، ده  
لازم ياخذ حقنه مهدئة وبنام ٤٨ ساعة.

الظابط: بس ده يا دكتور عنده تهمة بلاغ كاذب  
وإزعاج للسلطات.

شريف: يا حضرت الظابط ده مريض نفسي  
ومعاه شهادة معاملة أطفال، يعني القانون مش  
هيعاقبه وأنا بقدم لحضرتك المساعدة وبمنع عن  
حضرتك كارثة ليك أنت والعساكر بتاعتك، بعد  
إذناك سيبه وأنا هعالجه وهو عد حضرتك إني مش  
هسيبه لحد ما يقدر يعيش ويتعايش مع المجتمع  
علشان ما تحصلش كارثة زي دي تاني.

الظابط: خلاص سيبوه واحنا آسفين لحضرتك  
مره تانية يا دكتور.

شريف: لا ولا أسف ولا حاجة يا فندم، دانا اللي  
المفروض أتأسفلكم من اللي عمله المجنون ده.

خالد: بس أنا مش مجنون.

شريف: شرفت يا حضرت الطابط.

الطابط: سلام.

# باب النجاة

خالد: انتوا صحيتوا ازاي كلكم ولا الدكتور  
موتني معاكم ولا احنا فين؟!!

شريف: أنت كانت فاكِر هموت الناس يا خالد..  
ليه هو أنا مَعنديش قلب ولا دين ولا رحمة، دي  
بشر يا خالد مش فراخ.

خالد: يعني البشر دول كلهم عايشين وأنا مش  
مجنون؟!!

شريف: لو مش عايز تكون مجنون عادي الضابط  
لسه ممشيش.. أروح أقول له إنك مش مجنون  
دلوقتي وهو هياخذك وهيعمل معاك الواجب!

خالد: لا أنا مجنون وابني مجنون كمان كمل يا  
دكتور دماغك الماظات.

شريف: المهم يا جماعة أنا معاكم ومش هسيبكم  
أبدًا، أنتم ولا مجانين ولا مرضى نفسيين، أنتم  
بس عندكم صدمة وكل واحد فيكم صدمته غير  
التانية، والصدمة دي مع العلاج والوقت هتمشي

والدنيا هترجع زي زمان وأحسن، وأنا معاكم  
مش هسييكم لحد ما أرجعكم لطبيعتكم وأحسن  
كمان، بس لازم أعرف مين فيكم المستعد يكمل  
معايا ومين فيكم عايز يموت ويفضل يدخل  
الجهاز؟!!

الجميع: لا احنا عايزين نكمل معاك يا دكتور.

شريف: وهي دي نظرية الفرطقة، طول ما  
الانتحار مرفوض هتلاقي في ناس كتير بتنتحر،  
لكن لو الانتحار بقى متاح لحد عندك وأخذت  
فرصة إنك تجرب وجع الانتحار وخيروك إنك  
تكمل في الانتحار وتموت ولا ترجع وتعيش  
هتختار ترجع وتعيش عشان مش هتكون قد آلام  
الانتحار، فلازم كلنا نفرط عشان كلنا نعرف  
نعيش، يبقى لازم كلنا إيه..!

الجميع: نفرط يا دكتور.

شريف: صح كده لازم نفرط علشان نقدر نكمل  
ونستمتع بالحياة، يلا قدامنا شغل كتير لازم  
نعمله.. يلاً يا أبطال!

(وبعد مرور ستة أشهر..)

خالد رجع العيادة والمرضى رجعوا كل واحد  
لمكانه وأحسن، ومفيش فيهم ولا واحد فكر في  
الانتحار تاني بعد ما شاف الموت بعنيه، وأما  
شريف اتكرم من وزير الصحة ووزير الشباب  
والرياضة على نظرية الفرفة، وبدل ما كان  
ناجح بتقدير مقبول مع الرأفة في الطب، دلوقتي  
نظريته بتدرّس في أكبر جامعات العالم.. ودي  
نتيجة اللي بي فكر برّه الصندوق.

نظرية الفرفة هي نظرية مصريه تغزو  
الجامعات العالمية.

آه صحيح نسيت أقول لكم شريف والدته رضيت  
عليه بعد ما أكل العدس طبعًا، ودعيتله وكانت



أبواب السماء مفتوحة وأخذ جائزة كده بيقولوا  
عليها "نوبل" ابن المحظوظة، ده بعد ما أنقذ  
أكثر من مليون شخص كان مُقبل على الانتحار.

## النهاية